

1. Rachael Sorige (NCD)
2. Allan Rabu (NCD)
3. Cathy Kevin (NCD)
4. Robert David (NCD)
5. Winniefred Miria (NCD)
6. Yamai Kont (WHP)

Moa Stori insait: K3.4 milien long stretim Sabama Pari rot - 2

BSP kam bek long Maprik - 20



pepsi pipol



www.facebook.com /pepsipng



Like

na painim aut moa long ol narapela promosens bilong nipla bihain taim.



Patrick Pruaitch, MP bilong Aitape Lumi.

O'Neill makim nupela ministra

Frieda Sila Kana i raitim

PRAIM Minista bilong Papua Niugini, Peter O'Neill i tokaut pinis long senis bilong tripela ministri insait long gavman.

Patrick Pruaitch, Memba bilong Aitape Lumi na pastaim minista bilong Fores na Klaimet Senis, nau i kamap Minista bilong Tresari. Douglas Tomuriesa, Memba bilong Kiriwina-Goodenough nau i kamap Minista bilong Forestri na Klaimet Senis na Benjamin Poponawa, Memba bilong Tambul Nebilyer i kamap Minista bilong Leba na Industriel Rilesens.

Praim Minista O'Neill i tokaut long wanpela midia konprens aste bihain

long ol ministra i mekim promis long ai bilong Gavana Jeneral, Sir Michael Ogio long Gavman Haus.

Mista O'Neill i tok las wik taim em i tokaut olsem em i rausim tupela ministri long tupela koalisen patna memba bilong en, em i tok bai em i bihainim ol toktok bilong Alotau Akod, na mekim dispela disisen. Mista O'Neill i toktok wantaim koalisen patna bilong em, T.H.E Pati, na askim ol long makim ol kenidet bilong ol long kisim ol dispela ministri.

"Olsem na nau yu lukim Kiriwina-Goodenough MP, Tomuriesa na Tambul-Nebilyer MP, Poponawa i kamap ol nupela memba bilong Kabinet," Mista O'Neill i tok.

"Mista Pruaitch, lida bilong Nesenel Alaiens Pati nau i kisim dispela senia ministri potfolio bilong Tresari. Pruaitch em i wanpela senia politisen na em i ken lukautim displa potfolio taim ikonomi bilong yumi i laik go insait long nupela mak," em i tok.

"Insait long dispela wok bilong em olsem Tresari Minista, Mista Pruaitch nau bai kisim wok bilong Siaman bilong Wol Benk na Intanesenel Moneteri Fan Grup. Dispela posisen em ol i no givim long wanpela man tasol, nogat. Ol i makim bilong nesen. Mista Pruaitch olsem Minista bilong Tresari minista bai i kamap siaman bilong dispela ol mani benk," Mista O'Neill i tok.



Praim Minista bilong Australia Tony Abbott.

Australia Praim Minista bai kam long PNG tude

Praim Minista bilong Australia Tony Abbott bai kam long Papua Niugini long Tude.

Dispela em i namba wan taim Mista Abbott bai kam long Papua Niugini bihain long em i kamap Praim Minista bilong Australia las yia.

Praim Minista Peter O'Neill i tok em i stap tasol long lukim Minista Abbott.

"Mi wet tasol long bungim Praim Minista Abbott taim em i kam long PNG. Australia em i gutpela pren bilong Papua Niugini wok pren bilong yumi i bin stat long taim na i stap strong yet.

Moa long pes 2



Wantok Niuspepa bai kamautim nupela 4-pela inset INGLIS niuspepa insait long Wantok niuspepa...

Today

Wantok TODAY em i Inglis pepa i raitim ol stori long wanem santing i kamap long kantri TUDE!!! NOKEN ABRUSIM!!!

Rausim tasol insait long Wantok pepa!



Our popular 40th Anniversary fare is back!

Available now until the 31st of May 2014. So book early!!

Call toll free on 180 3444 or visit www.airniugini.com.pg and contact your nearest Air Niugini Travel Centre or Travel Agent for further details.





Praim Minista Peter O'Neill i sekan long Benjamin PoPONAWA na Patrick PrUAITCH i sanap long namel na Douglas Tomuriesa i sanap long baksait bihain long ol i sain olsem ol minista.

Poto: Nicky Bernard

K3.4 Milen bilong stretim Sabama Pari rot

Kolopu Waima i raitim

SABAMA Pari rot upgrading long NCD bai kisim mani mak long K3.4 milen.

NCD Gavana Powes Parkop i mekim dispela toktok long taim bilong opim rot long Sabamamaketa.

Mista Parkop i tok rot i go long Pari viles em i wanpela olpela rot we ol i bin mekim taim ol waitman lukautim PNG na i stap olsem yet. Nogat wanpela wok i bin kamap long stretim gen dispela rot. Olsem na rot i go bagarap olgeta na ol kar i hat long go i kam na ol manmeri tu i kisim taim long go i kam.

Em i tok Mosbi Saut ilektoret i stap namel long siti tasol planti sevis em i no save go long dispela ilektoret. Dispela bikos ol

membra i no save wok bung wantaim Gavana na ol komyuniti i no wok bung wantaim memba long karim sevis i go long ol pipel.

Mista Parkop i tok narapela tupela ilektoret bilong NCD i stap orait wantaim liklik nid long sevis.

Mista Parkop i tok tenk yu long Memba bilong Mosbi Saut Memba Justin Tkatchenko long gutpela lidasip bilong em long wok bung wantaim Gavana. Em i tok em i namba wan taim bilong em long wok bung wantaim memba bilong dispela ilektoret.

Gavana Parkop i tok NCD i bin wokim 54 rot insait long Nesanel Kapital Distrik stat long las yia i kam nau long mani mark long K66 milen.

Em i tok Pari rot bai kostim K3.4 milenna em bai kamap

wanpela ikonmik laip lain bilong ol lain stap long hap.

Mista Tkatchenko i tok tenk yu long Gavana Parkop long givim mani long wokim dispela rot. "Dispela rot em NCD ii wokim. NCD givim mani na NCD bai wokim dispela rot. Olsem na mi tok tenk yu long Gavana Parkop long luksave long nid bilong mipela ol lain long Mosbi Saut," Mista Tkatchenko i tok.

Mista Tkatchenko, husat i Minista bilong Spot na 2015 Pasifik gem i tok dispela rot bai givim sevis long planti lain long Pari viles. Em i tok rot bai i go olsem long Sabama, Joyce Be, Kirakira na planti lain bai kisim helpim long dispela rot.

Em i singaut long ol lain long lukautim dispela rot na rot bai lukautim ol.



OL yangpela manmeri na lapun tu, i kam raunim Justin Tkatchenko long soim amamas long wokim rot bilong ol. Justin Tkatchenko i sanap namel long grup. *Poto Kolopu Waima.*

PM bilong Australia, Tony Abbott i kam tude

I kam long pes 1

Yumi bai strongim moa dispela."

"Raun bilong em bai givim mipela sans long tok-tok long sampela samting long strongim tupela kantri wantaim," Mista O'Neill i tok.

Mista O'Neill bai toktok wantaim Minista Abbott long Australia Aid Program, Manus Rijonal Prosesing Senta bilong Asailiam Sika, Australia Visa, wok bilong PNG LNG Projek, PNG bai helpim Fiji long ilekesen, tred na invesmen.

Praim Minista bai toktok long Abbott long ol wok bilong ol ki gavman polisi olsem fri edukesen, fri heltke, wokim rot na bris, modenais Polis na Defens, putim mani long Oil, Ges, na mineral projek long

putim ikonmik bilong PNG i kamap gut long bihain taim.

Mista Abbott bai kam pundaun long Jackson ples balus long 7 o'clock nait. Bihain en bai go slip long Airways hotel. Long 7:55 morning long Fraide em bai go long Palamen Haus we ol PNGDF bai lainap long kisim em na long 8:30am, bai bungim Gavana Jeneral Sir Michael Ogio. Bihain em bai go long Palamen Haus na bai bungim Peter O'Neill na tupela bai toktok na sainim ikonmik Koporesen Triti.

Mista Abbot bai go long Karitas Gels Teknikal Sekenderi na opim ol samting we Australia Aid i wokim long 2pm. Ol lain long Koki bai i gat sans long lukim Mista Abbott taim em i go

long Koki long 3pm long lukluk raun long Koki maket.

Mista Abbott bai go long Bomana war matmat long Sarere morning. Lusim Bomana long 9am na em bai go long Motukea na bihain go long LNG sait long Papa Lealea we Exxon Mobil bai toktok wantaim Mista Abbott.

Mista Abbot, long 1pm bai go long Koki Praimeri skul long graun brekingseremoni bilong nupela klasrum we AusAid na NCD Gavana bai wokim. Bihain long dispela em bai go long Bautama long hap bilong Pot Mosbi Siti Misin. Apinun em bai kam rest long Airways na long Sunday morning em bai go bek long Australia.

Ol Manus Ailan detensen senta i luk pret ...Tasol ol i luk helti

I kam long ABC

WANPELA jas bilong Papua New Guinea i karim aut ol wok painim long sait bilong human rait long ditentsen senta bilong Australia long Manus Ailan i tok em i lukim olsem ol pipel insait long senta i luk pret.

Jastis David Cannings, i tok lukluk bilong ol pipel insait long senta i olsem ol i pret.

Em i wokim dispela toktok taim em na ol narapela jas long PNG i go long Manus detensen senta bilong Australia long Manus Ailan long dispela wik.

Aninit long lo bilong PNG, Suprim kot i ken kamapim

tingting long mekim ol wok painim i go long ol wari bilong ol human rait.

Jastis Canning i bin tok olsem bihain long ol pait na trabel bilong las mun we i kamapim dai bilong wanpela asailiam sika na planti ol arapela i bin kisim bagarap.

Long lukluk raun bilong em i go long Manus ditenses senta namba wan samting em i bin lukim em bikpela namba bilong ol sekuriti opisa kamap na soim pes bilong ol.

Em i tok long lukluk bilong em, ol wokman na meri i mas stretim gut ol samting long sotpela taim long ol eksasais

na ol haus slip bilong ol asailiam sika .

Em i tok em i no toktok wantaim sampela asailiam sika yet, tasol em i tok ol i bin traim autim kros bilong ol i go long em olsem ol toilet na sawa rum ol i bin stretim na klinim gut redi long lukluk bilong em.

Jastis Canning i tok long medikal eria, ol i luk klin na olgeta samting em ol i stretim gut. Ol asailiam sika yet i luk gut na ol i no gat sik na tu, ol i no luk hangere.

Narapela samting em i tok em, ol asailiam sika em i lukim i luk orait, ol i kaikai gut na ol i dresap gut.

Woks Dipatmen givim ripot

Kolopu Waima i raitim

DIPATMEN bilong Works nalmentesen i namba wan gavman dipatmen long givim mani ripot bilong en i go long Fainens long Mande.

Ministabilong Woks nalmentesen Francis Awesa husat i bin givim ripot long Minista bilong Fainens James Marape i tok gavman i bin putim planti manilong dispela dipatmen bilong stretimrot, ples balus na ol bris insait long kantri.

Mista Awesa itok dipatmeni bin karim aut planti ol rot projek long las yia i kam dispela yia na em bai go yet long fixim ol rot insait long kantri.

Em i tok planti taim ol kontrakta i no save mekim o stretim gut ol rot. Sampela taim ol i save stop namel nai no pinisim wok bilong ol. Dispela pasin i save kamap

long planti yia i go pinis na ol mani gavman i save putim i save lus nating.

Em i tok nau ol ensinia bilong Dipatmen bai was gut long wok bilong ol kontrakta.

Mista Awesa i tok em i save long wokim rot tu na em yet bai putim was longkos ova ran long wok ol kontrakta bai mekim.

"Mi gat eksperiens long wokim rot na mi bai was long ova ran kos bilong ol kontrakta. Planti tenda i bin go aut pinis na mi save planti kontrakta bai kam long wokim rot tasol wok bilong ol bai i gat kwaliti na i ken stap longpela yia," Mista Awesa i tok.

Minista bilong Fainens James Marape i tok tenk yu long Awesa long givim ripot bilong dipatmenna em i wanpela rekot dipatmen i putim.

"Mi tok tenk yu long Seketeri bilong Dipatmen David Werehna Minista Awesa

long kamap namba wan dipatmen namel long ol narapela long givim ripot. Na tu, Woks i putim rekot na histori bikos nogat wanpela Minista bipo long dispela dipatmen i save givim ripot," Minista Marape i tok.

Minista Marape i tok Dipatmen bilong Woks i bin kisim K1.8 bilien long 2013 baset. Na planti moa em bai kisim yet long dispela yia long stretim ol rot, na ol narapela samtung tu.

Fainens Dipatmen itok klia long ol Minista na Seketeri long givim 2013 mani ripot pastaim na bai ol i kisim 2014 mani. Mista Marape i singaut long ol narapela dipatmen long givim ripot bilong ol.



(L-R) Woks Seketeri David Wereh, Fainens Minista James Marape kisim Ripot long Woks Minista Francis Awesa. Poto Kolopu Waima.

PNG i redi long namba 5 Melanesia Festival ov Arts

Kolopu Waima i raitim

MINISTA bilong Turis, Arts na Kalsa Boka Konda i tok Papua Niugini i redi long lukautim namba 5 Melanesia Festival ov Arts na Kalsa.

Minista Konda i tok dispela festival bai kamap long taim stret long Jun 28 i go pinis long Julai 11 2104.

Em i mekim dispela toktok taim wokman bilong Nesanel Kalsa Komisen i raun wantaim singsing grup na soim kala na strong long las wik Sarere long Pot Mosbi. Ol imekim dispela long soim olsem ol i redi long holim festival.

Mista Konda i tok nau i taim bilong ol pipel bilong PNG na ol pipel i mas redi long ol tumbana samtung bilong ol. Papa Niugini, Fiji, Ni Vanuatu na Solomon Island bai selebretim festival. Torres Strait Ailan bilong Australia, Timo Leste na Wes Papua long Indonesia bai kam lukluk raun tu.

"Em i taim bilong Papua Niugini long soim kalsa, pasin na ol tumbuna samtung bilong em tu. Yupela ol pipel bilong Papua Niugini mas wok bung wantaim na redi long soim ol kainkain kalsa bilong yumi long ol narapela kantri insait long Pasifik Ailan kantri," Mista Konda i tok.

Em itoksav long ol ausait kantri olsem gavman bilong Papua Niugini bai wok bung wantaim Dipatmen bilong em long strongim sekyuriti long taim ol i kam stap long soim kalsa bilong ol.

"Mipela i bin toktok pinis wantaim ol polis long ol bai strongim sekyuriti taim bilong festival. Mi nau tok klia long yupela olsem dispela festival bai kamap gut na bai pulap long amamas," Minista Konda i tok.

Kodineta bilong 5th Melanesia Arts na Kalsa John Wani i tok bai festival bai kamap klostu long Palamen Haus. Ol i stretim graun na ol wok bai pinis long dispela mun.

"Stat long namba foa mun, bai mipela wokim haus," em i tok.

Mista Wani i tok ol bai wokim 22 provinsal haus, 4 Rijonal haus, tupela stej-wanpela bikpela na narapela liklik long ol kantri bai kam soim kalsa na 6pela ol arapela ples insait long Mosbi long soim bilas na kalsa.

Em tok tu olsem ol i makim pinis foapela rijonal senta long soim kalsa. Long Hailans rijon em long Hagen, Momase rijon long Lae, Sauten rijon long Alotau na Niugini Ailan long Rabaul.

Nesanel Kalsa Komisen bai mekim promosen na awenes kempen long 16 wik stat long last wik Sarere. Ol bai raun long flot, pilai musik, manmeri bai bilas na raun long siti long olgeta wik Sarere i go pinis long 16 wik olgeta.



AN ACCOUNT FOR ALL AGES

Choose the bank account that suits your family

01

KIDS SAVINGS ACCOUNT

For children aged 0 - 15 years

- ✓ NO fees
- ✓ Tiered interest plan
- ✓ Withdrawal restriction to help you save
- ✓ No minimum balance required

02

SUMATIN ACCOUNT

For full time students aged 15 - 25 years

- ✓ NO fees
- ✓ Mobile, Internet and Phone Banking
- ✓ Optional Visa Debit card
- ✓ No minimum balance required

03

KUNDU STANDARD

- ✓ Best suited for fewer monthly transactions
- ✓ NO monthly maintenance fee
- ✓ Pay as you go transaction account
- ✓ No minimum balance required

04

KUNDU PACKAGE

- ✓ Best suited for multiple transactions
- ✓ One fixed monthly fee
- ✓ All BSP electronic transactions are FREE
- ✓ First 6 branch transactions per month FREE

For more information
320 12 12 / 7030 12 12 - 24/7
service@bsp.com.pg
www.bsp.com.pg

Apply in-branch today!





Polis Komisina Toami Kulunga go long Nadi, Republik ov Fiji long stap long 4th Melanesia SpearhetGrup (MSG) bilong polis komisina Konfrens. Konfrens i stat long Mande. Defens, IntanalSekyuritinalmaigeresen Minista JoketaniCokanasiga bilong Fiji i opim dispela kibung. Polis Komisina bilong Vanuatu, Solomon Ailan, Fiji na Papua Niugini i bung long dispela kibung. Long dispela poto i kam long polis midia unit i soim Komisina Kulunga (givim beksait) i stap long kibung. *Poto i kam long polis midia na Kolopu Waima i raitim.*

Lo na oda impoten long divlopmen

Kolopu Waima i raitim

POLIS Minista Robert Atiyafa i tok lo na oda i impoten long ol wok bai divelopmen.

Mista Atiyafa mekim dispela toktok long taim em i kisimwok bilong polis minista long last wik Fraide.

Emi tok gutpela sindaun long groim ikonomi bilong kantri bai no inap kamap sapos lo na oda i bagarap.

Em i tok planti ol gutpela samting i bin kamap pinis na sampela moa divelopmen i laik kamap long PNG na gat bikpela wari long mekim gut long polis fos long kantri long stretim lo na oda.

Mista Atifayai tok em bai wok klostu wantaim Polis Komisina long helpim ol polisman na meri long mekim gut wok bilong ol na sapotim ol long wanem ol samting ol bai nidim long mekim wok bilong ol.

Em i tok tu olsem em bai lukluk long haus bilong ol polisman na meri insait long kantri.

Mista Atiyafa i bin givim sampela

eksampel long distrik bilong em yet long Henganofi long Isten Hailans i bruknai nidim planti wok mentenens.

“Mi gat 16 polisman i stap long ol bagarap haus we i nogat wara na toilet ol i save digim long graun. Ol i save stap yet long ol dispela haus moa long 20 yia. Ol save karim ol olpela gan we i no save wok gut. Mi ting wankain samting mas kamap long ol narapela distrik,” Minista Atiyafa i tok.

Em i tok tenk yu long olpela Polis Minista NixonDuban long putim planti nupela program long dipatmen long strongim wok bilong daunim hevi long lo na oda.

“Mi mas tok tenk yu long Polis Mobilaisesen Program yu bin kamapim na divelopim bilong Polis Fos. Bai mi wok klostu wantaim Polis Komisina long pinisim dispela progrem,” Mista Atiyafa i tok.

Em i tok em bai no inap mekim ol gris toktok tasol wanpela samting em long askim gavman long stretim ol haus bilong ol polis.



Olpela Polis Minista Nixon Duban i sekan wantaim nupela Polis Minista Robert Atiyafa (raitim). Polis Komisina Toami Kulunga i sanap namel long tupela. *Poto Kolopu Waima.*

Polis holim foapela bihain long studen i dai

POLIS bilong Madang i kisim foapela saspek bihain long wanpela studen bilong Divine Wod Yunivesiti (DWU) i bin dai long wiken.

Presiden bilong DWU Fr Jan Czuba i tok ol polis i toksave olsem polis i bin kisim foapela saspek. Ol dispela saspek stap nau long polis rumgat.

“Ol polis i toksave long yunivesiti olsem ol i luksave pinis long ol dispela saspek. Ol i stap long rumgat,” said Fr Czuba.

Fr Czuba i tok Kominkesen Arts sumatin, Nigel Laki, em ol raskol isutim em long naiplong 7:20 nait taim em i wokabut wantaim ankol. Ol i bin kilim em namel long Nabasana haus bilong ankol bilong em.

“Yunivesiti i save tok orait long ol sumatin i go aut na stap wantaim ol Wantok bilong ol longwiken tasol nau dispela problem kamap na givim planti salens long lo na oda long provins.”

“Pipel i gat rait long go na stap wantaim ol famili na wantok. Na oli mas kamap fri na seif long wokabout long ol strit long Madang,” Fr Czuba i tok.

Em i tok yunivesiti i statim klas gen na ol sumatin i go skul long Mande.

Em i tok ol sumatin i go long klas tasol yunivesiti i sanapim wanpela haus kra i tu long we bilong PNG long soim respek.

“DWU komyuniti i sanapim wanpela hauskra i long wikenna ol manmeri i kam toksori na soim rispek stap,” FrCzuba i tok.

Em i tok DWU edministresen wantaim makim DWU sumatin i wok klostu wantaim polis edministresen na Madang komyuniti long painim husat stret i kilim dispela sumatin na painimaut as bilong dispela trabel.

Gavana bilong Madang Jim Kas i wok wantiam ol dispela lain long kamapim gutpela sindaun long Madang taun.

Wankain taim, ol man i go pas long bikpela skul i stap long Madang olsem DWU, PNG Maritime Koles, Madang Teknikel Koles, TusbabSekenderi and Luteran Skul ov Nursing i bung long Tunde long DWU long toktok long hevi lo na oda.

Olpela Sif Jas Sir Arnold Amet i bin stap siaman dispela bung.

Haoda opim bris long Gemo viles

Kolopu Waima i raitim

Sentral Gavana Kila Haoda i mekim liklik toktok na soim eksen long pipel bilong en long givim sevis.

Gemovilis long insait long Rigo distrik long Sentral provins i hamas tru long lukim 7mita bris Gavana Haoda i opim.

Mista Haoda i tok dispela brisi bin kostim moa long K400, 000. Em i tok em i no man bilong toktok but em i man bilong wokim eksen.

Mista Haoda i tok rot nabrisi wanpela ki infrastraksa. Dispela tupela samting i orait, ol narapela sevis bai kam isi long ol komyuniti.

Em i tok edukesen tu i wanpela bikpela samting, Aninit long gavman bilong em, em i tok em i putim edukesen namba wan long plen bilong provins bilong en.

Gavana Haoda i tok emi put aut toksave pinis long salim 5pela meri long kisim trening long karim balus.

Em i tok Sentral provins i gat planti ol skul man bin stap bipo tasol nau em ol pikinini i no wok gut long skul na namba bilong ol Sentral sumatin go skul long bikpela skul i liklik tumas.

Mista Haoda i tok em i like kisim bek ol gutpela nem long taim bipo.

Em i tok human risos em i ki divelopmen patna na em i like kamapim planti ol human risos long provins long ol i ken kamapim gutpela sindaun bihain taim.

Fainens na Edukesen dipatmen mekim wok painimaut

SEKETERI bilong Edukesen Dokta Michael Tapo i tok Dipatmen bilong Edukesen wantaim Dipatmen ov Fainens i bin sanapim wanpela independen odit tim long mekim wok painimaut long ol kontrakta long wanem wok ol i bin mekim long olgeta skul insait long Nesenel Kapital Distrik (NCD).

Dokta Tapo i tok olupela Minista

bilong Edukesen James Marape i bin askim sampela kontrakta long bihainim tok bilong em na ol i no ken bikhet na bihainim ol dispela oda. Dokta Tapo tu i sapotim ol tok-tok bilong Mista Marape.

“Yupela mas lukim gut Pablik Fainens Menesmen Ekt, na wanem samting dispela Ekt i tok, “Dokta Tapo i tok.

Em i tok audit tim bai lukluk long

kleim ol kontrakta i bin mekim na tu wok ol i bin mekim. Audit tim bai lukluk long olgeta wok ol i mekim long olgeta skul long NCD, OLA opis na ol narapela edukesen wok.

Dokta Tapo i tok i nogat wanpela mani long 2013 o 2014 baset bilong kapital wok na ol narapela sevis.

Seketeri Tapo i tok planti kontrakta naol lain save givim sevis i

no lukluk gut long baset. Gavman i no bin givim wanpela mani long Dipatmen bilong Edukesen long stretim ol skul infrastraksa long 2013 na 2014. Nogat.

Em i tok Dipatmen i no bin sainim kontrak pepa wantaim wanpela kontrakta o wanpela man o kampani long 2013na 2014. Na i no gat wanpela tenda tu long givim kontrak.

Dokta Tapo i tok odit tim bai lukluk tu long sampela mani ol i bin baim pinis long ol dispela lain i givim sevis na ol kontrakta. Sapos ol i painimaut olsem em i rong, ol dispela lain bai go long kot.

Polis bai rausim ol manmeri i kam na bung stap arere long Edukesen opis long Fincop Haus long Waigani.

Hatwok i karim kaikai

Isaac Liri i raitim



Long namba 32 greduesen bilong Divine Word University (DWU) long Madang long dispela mun, 715 sumatin i bin greduet.

Antap long dispela 715 sumatin, i bin gat ol arapela pablik sevan husat i greduet wantaim ol masta digri bilong ol, na tu, ol arapela sumatin bilong ol koles i kam aninit long DWU.

Sampela sumatin i bin kisim ol spesel awod long dispela greduesen.

Wanpela bilong ol dispela spesel awod em Foreign Affairs Academic Excellence Award in International Relations.

Dispela awod em Dipatmen ov Foren Afeas i sponsa long en.

Foren Afeas Dipat-

senel Rilesen i bin kisim dispela spesel awod.

Ekting Seketeri bilong Papua Niugini Dipatmen ov Foren Afeas, William Dihm, i bin stap long dispela greduesen long givim dispela awod long Mis Kliawi.

Dispela spesel awod bai i lukim Mis Kliawi i stap insait long wanpela 9 mun trening program wantaim Dipatmen ov Foren Afeas, na bihain bai ol i givim em wanpela posisen long dipatmen.

Mis Kliawi i amamas tru long kisim dispela awod na em i tok olsem hatwok bilong em long foapela yia i karim kaikai nau

Gret Poin Avers (GPA) bilong Mis Kliawi taim em i kisim digri bilong em i bin stap olsem 3.25.

Ekting Seketeri bilong Papua Niugini Dipatmen ov Foren Afeas, William Dihm i sanap wantaim wina bilong spesel awod Claire Kliawi. *Poto Helen Aitsi*

men i bin sainim wanpela agrimen wantaim Dipatmen ov PNG Stadis na Intenesenel Rilesen long dispela greduesen.

Dispela agrimen i

makim olsem ol bai i givim sapot long taim bihain tu.

Claire Kliawi bilong Is Sepik na Is Nu Briten long dipatmen bilong PNG Stadis na Intene-

Gavana tokim ol sumatin go bek long klas

Gavana bilong Morobe Kelly Naru i salim tok lukaut i go long ol Morobe sumatin husat i stap long Yunivesiti ov Teknoloji long noken jonim protes o ol bai lusim skolasip.

Gavana Naru i tok sapos ol sumatin i go het yet long protest, ol bai no inap long kisim skolasip Morobe provinsal gavman i save givim long ol neks yia.

Em i tok planti pikinini i stap long kisim dispela skolasip nai no ol tasol. Ol i go long skul long

kisim save nai no long go joinim ol protes na bagarapim skul wok bilong ol.

“Taim ol i bagarapim skul wok, ol i bagarapim laip bilong ol,” Mista Naru i tok.

Wankain taim, Gavana Narui askim Nesenel Gavman long putim aut ripot bilong wok painimaut ol i bin mekim na rausim olupela Vais Sansela Dokta Albert Scharm.

Em i tok em i sapotim ol sumatin long dispelaaskim tasol. Em i

tok gavman i mas tokaut long Sevua ripot we olupela Jas Jastis Mark Sevua i go pas long mekim wok painim.

Gavana Naru i tok ol sumatin bai no inap long lusim protes sapos gavman i no tokaut long dispela ripot. Gavman mas tokaut long wanem samting ripot i bin painimaut na wanem samting ripot i tok long gavman bai mekim.

Em i tok gavman i mas tokaut long dispela na ol studen bai go bek long klasrum na skul.

Nupela flawa stua long Nature Park

POT Mosbi Nature Park i kirapim nupela flawa stua bihain long ol i bin wokim nupela rot i go insait long Pak.

Nupela stua em ol i kolim ‘Nesa Floris’. Dispela nupela flawa stua, i save salim nupela flawa na ol plastik flawa, ol flawa bilong matmat, flawa bilong kaunta bilong ol opis na bilong taim bilong marit na ol narapela bikipela de.

Nupela Floris Menesa, Maggie Aisa i tok, “Nesa Floris em i nupela stail bilong mekim bisnis bilong flawa. Em i givim planti kain kain rot bilong mekim flawa bisnis i ken resis wantaim ol narapela flawa bisnis long siti.”

Wanem samting i mekim Nesa Floris i narakain long ol narapela bisnis wankain olsem? Bekim bilong askim em olsem ol kastoma i pilim gutpela long save olsem olgeta mani ol i kisim long hia em i go bek long sapotim wok bilong Pot Mosbi Nature Park olsem wanpela ogenaimesen i no save mekim profit. Nesa Floris i save putim gutpela prais long ol flawa bilong ol

long ol kastoma bai i ken amamas long baim long liklik prais tasol.

“Mi laik strongim ol lain bisnis na ol manmeri long traime mipela long wanem kain nid yupela gat long kisim naispela flawa. Bai yu kirap nogut long lukim kain stail bilong mipela,” Misis Aisa i tok.

Nesa Floris stua i stap long bikipela get bilong Pot Mosbi Nature Park na i save op long 8 klok moning taim na i pas long 4 klok apinun long Mande i go Fraide. Long wiken, bai yu toktok wantaim menesmen long ol i opim na helpim yu.



Nature Park em i wanpela projek Gavana Powes Parkop na NCDC i go pas long en.

Sampela wok lain bilong Nature Park (L-R) Joyce Mailau na Menesa, Maggie Aisa i sanap namel long ol flawa insait long nupela Nesa Floris stua



Yut, Meri na Famili Pastor Barbara Lunge Jisas daunim strong bilong satan pinis

"Bipo yupela i save mekim ol kain kain rong, na yupela i bihainim pasin bilong olupela bel, na dispela i kilim yupela i dai. Tasol God i mekim yupela i kisim laip wantaim Kraiss, na God i bin lusim olgeta rong bilong yumi. Lo i bin kotim yumi na kamapim ol rong bilong yumi, na mekim yumi i stap aninit long ol tok na strong bilong en. Tasol God i bin rausim olgeta dispela tok bilong kotim yumi, na em i pinisim strong bilong lo na nilim em long diwai kros bilong Kraiss. Em i pinisim strong bilong ol strongpela spirit na olgeta kain samting i gat strong. Long diwai kros God i soim olgeta man olsem em i winim pinis ol dispela samting na i mekim ol i kamap olsem samting nating." (Kolosi 2:13-15)

Jisas i tok, "Em i pinis nau." Wok bilong diwai kros em i stretim pinis. (Jon 19:30) Yu olsem wanpela pikinini man na pikinini meri bilong God husat i kamap nupela, i mas stadi long ol toktok bilong God long yu ken klia gut long wanem wok Jisas i bin mekim long baim yu bek antap long diwai kros.

"Em i mekim sakrifais long bekim sin bilong olgeta, taim em i givim em yet. "Em i mekim ofa wanpela taim tasol wantaim blut bilong em yet. Em i givim laip bilong em yet long God. (Hibru 7:27, 28; 9:12, 24-28)

Em i baim bek yumi pinis wantaim bikpela pe. Blut bilong em inap long wasim olgeta sin long olgeta taim. Em i wasim tingting bilong man, long em i ken lotu long God. (1 Pita 1:18-20; Jon 1:29; Hibru 9:14). Em i pinisim wok bilong bagarapim sin. Kraiss i no save mekim sin, tasol God i laik helpim yumi, olsem na em i bin bungim olgeta sin bilong yumi antap long em, na Kraiss i kamap olsem man bilong mekim sin tru. God i mekim olsem bai yumi ken i stap long Kraiss, na long strong bilong em yumi ken kamap stretpela manmeri bilong God. (2 Korin 5:21; Rom 10:1-4). Em i pinisim wok bilong winim pait wantaim satan. (Jon 12:31, 32; 1 Jon 3:8). Em i winim pait bilong winim dai pinis. "Tru dispela bodi i save bagarap, em bai i senis na i stap gut oltaim. Na dispela bodi i save dai, em bai i senis na i stap laip oltaim...God i winim pait na em i pinisim dai tru." (1 Korin 15:54-57). Em i winim pinis wok bilong mekim yumi kamap santu. Pawa bilong senis i save kam long diwai kros. (Hibru 10:10-14). Em i pinisim wok bilong winim pasin bilong graun pinis. (1 John 5:4-5).

Em i pinisim wok bilong givim pawa na strong i go long sios long bipo, nau na bihain tu. Samting Jisas i mekim antap long diwai kros em i olsem lo i givim yumi strong long wokabaut wantaim pawa bilong Kraiss.

Ol pablik sevan laik daunim pasin bilong paitim meri

SAMPELA senia pablik sevan i bin kisim skul long Pablik Sekta Male Edvokesi Program bilong Strongim Jenda ikwaliti, Sosol inklusen na bilong Pinisim Vailens long ol Meri.

Dispela trening em Australia gavman i helpim aninit long ikonimik na Pablik Sekta Program. Em i bihainim namba wan program we em i bin lukluk long kamapim pasin na save long sapatim na strongim ol meri na long lainim save bilong wok bilong strongim ol meri.

Dipatmen bilong Pese nel Menesmen Seketeri, John Kali i tok dispela Male Edvokesi Trening Program em i konaston insait long stratesi bilong ol long kirapim ol pablik long save long wanem samting olgeta lain i ken mekim long helpim ol meri i mas kisim gut ol sevis wankain olsem ol man, na long ol i gat wankain rait long mekim disisen olsem ol man long kantri.

"Pasin bilong strongim ol rait bilong ol meri long kisim wankain luksave em



Ol pablik sevan husat i kisim trening bilong Pablik Sekta Jenda Ikwali ti trening long Loloata Ailan.

i stap insait tru long ol wok ples polisi bilong yumi na em i makim wanem kain we yumi ol man bai i wok wantaim ol meri long ol kain kain ejensi bilong PNG Gavman," Mista Kali i tok.

"Dispela program i no bilong yumi long luksave tasol na traim long senisim tingting bilong ol 85,000 pablik sevan, nogat. Pasin bilong luksave olsem man na meri i wankain, em i namba wan long yumi bai daunim pasin bilong stap rabis o nogat mani na gut-

pela samting long PNG. Planti taim ol meri tasol i save strongim ikonimik na sapos yumi i no kamapim gutpela ples bilong ol meri i wok na kamap strong insait long ol posisen ol i holim, em yumi bai bagarap bikos i no gat wanpela kantri bai kamap strong sapos wanpela hap bilong populesen bilong en i no ron wantaim," Mista Kali i tok.

Minista bilong Developmen Kopresen, Stuart Schaefer i givim luksave long ol man pablik sevan

husat i kisim dispela trening long promis ol mekim long sapatim dispela program. "Dispela yia, bikpela toktok bilong Intenesenel Wimens De em "Kirapim Senis", na ol lain i stap long dispela trening long dispela wik i stap insait tru long kamapim dispela na ol i mas tingting long wanem samting ol i mekim pinis long PNG," Mista Schaefer i tok.

"Man i tokaut em i sanap wantaim toksave bilong mipela, 'Strongpela Man i save Rispekim ol Meri,'.



DUMP TRUCKS NOW IN STOCK!

Biggest Load Capacity in its Class. 300mm Extra Cabin Room for the Biggest Cabin in its Class and...

Unbelievable prices!



- ✓ Class leading extra spacious SuperCab
 - ✓ Dual circuit brakes with vacuum servo assist
 - ✓ Torsion Bar Tilt Cab
 - ✓ Nation-wide Service & Parts back-up.
- NO OTHER TRUCK COMES CLOSE!**



HD65 LIFTS THE LID ON RUNNING COSTS
Talk to PNG Motors to find out how HD65 could improve your business performance.

ASK ABOUT CUSTOMISED BODIES!

PNM PNG Motors. PNG People.

MORE TIME ON THE ROAD. LESS TIME IN THE WORKSHOP. HD65: IT MAKES BUSINESS SENSE!
Port Moresby: 325 5788 | Mount Hagen: 542 2100 | Lae: 472 4733 | Kokopo: 982 8514

Genuine Hyundai Parts
hyundai.png.com

Asdaiosis bai opim yia bilong famili

Veronica Hatutasi i raitim

KATOLIK Asdaiosis bilong Pot Mosbi bai opim "Yia bilong famili" long dispela Sande, Mas 24.

Pastorel Vika bilong asdaiosis, Pater John Willio i tok ol wan wan peris insait long asdaiosis bai opim na pasim program Desemba 28.

Het tok em "Rispektim envaironen na rot long bihainim em long kamapim gutpela famili envaironen we i stat long famili, i go long ol institusen na long ples bilong wok."

Pater Willio i tok ol wan wan

peris long asdaiosis i gat ol program long mekim aninit long dispela Yia bilong Famili. Em i tok ol wan wan peris, institusen na ol manmeri i mas kamapaim gutpela envaironen long ol ples ol i stap long en.

Pater Willio i tok bikpela samting em familil mas gat spiritual komyunio we ol i stap, pre na mekim ol samting wantaim long kisim strong na mekim wok na tu, kamapim gutpela laip.

Pater Willio i tok as tingting long makim dispela yia olsem Yia bilong famili em, long tude, ol kain samting i wok long bagarapim famili yunit na sios i

luksave long dispela na putim samting long ol famili i ken glasim na skelim na stiaim ol gut gen.

"Long dispela taim, planti pipel i tingting tumas long pasin na tingting long ol samting bilong graun, ol nupela samting na nupela teknoloji olsem fesbuk na mobail fon.

"I gutpela long ol papamama i sindaun na toktok long ol dispela samting wantaim ol pikinini bikos ol dispela samting i wok long bagarapim famili yunit.

"Yia bilong famili i laik kamapim gutpela envaironen na strongim ol famili long balensim laip bilong ol namel

long spiritual, fisikel na sosel sait," Pater Willio i tok.

Pater Willio i tok tu olsem ol nupela teknoloji na senis i kamap na planti famili long Mosbi i painim taim long traim stap long gutpela laip.

"Mi lukim olsem ol dispela samting i putim hevi long ol famili, na ol i pret na tanim i go bek long God," Pater Willio i tok.

Tasol em i tok planti famili na pipel i luksave long Bikpela na planti tu i save pre

Long wankain taim, Asdaiosis i mekim ol wok redi long selebretim 50 anivesari bilong em long Novemba 17, 2014.



Dok i baim mira

LAST wik, **Nia Chritina**, wanpela pren bilong mi long FaceBook, i bin postim wanpela naispela stori bilong dok wantaim mira.

Dok em i stap long wanpela ples i longwe tru long taun. Em i stap laip gut long ples, tasol sampela taim em i no amamas tu bikos em i laik kisim olgeta samting. Bikos em i tok; **"Sapos mi i gat olgeta samting, laip bilong mi bai i amamas tru."**

Wanpela taim em i harim ol haus lain i toktok long mira. Ol haus lain i tok: **"Sapos yumi i gat naispela mira, yumi bai lukim yumi yet stret."**

Em i tu harim olsem planti manmeri i save go long taun o narapela bikpela siti na baim mira. Dispela kain toktok i kirapim tingting bilong em. Nau em i gat strongpela laik long go long taun na baim wanpela mira bilong em yet, bai em i ken lukim em yet na amamas i stap.

Olsem na em i hatwok long bungim mani bilong em na taim em i lukim mani bilong em inap pinis long baim wanpela mira, em i redi long go long taun.

Wanpela bikpela moning tru, taim kakaruk i no kraik yet, em i kirap na wokabaut. Em i go i go...kalapim bikpela na liklik maunten, tasol inap long san i go daun pinis em i no kamap long taun yet. Taim bikpela tudak i kamap pinis, em i slip long rot tasol.

Narapela moning, taim tulait i bruk, em i kirap na wokabaut gen. Em i taitim bun stret. Em i tok: **'Mi mas kamap long taun bipo long 12 klok.'** Em i tru, em i kamap long taun bipo long belo taim.

Em slip malolo liklik aninit long wanpela diwai arere long taun. Bihain, taim em i pilim strong pinis em i wokabaut i go long stua ol i salim mira long en.

Taim em i kamap long wanpela bikpela stua, em i kirap nogut tru. Bikos long pes bilong em i gat 80 bikpela mira i stap, na mekim em i kirap nogut moa moa yet, bikos insait long mira i gat 80 dok i stap. Taim em i lukluk long ol, olgeta 80 dok tu i lukluk long em.

Taim em i wokabaut go kamap klostu long mira, olgeta 80 dok tu i wokabaut i kamap long em. Em i amamas tru bikos dispela 80 dok, i no gat wanpela i kros long em. Maski em i wanpela nupela dok long taun, tasol olgeta 80 dok i no kros o i no pait wantaim em.

Taim em i lukluk long hankais, olgeta i lukluk long hankais. Taim em i muvim tel bilong em, olgeta i muvim tel bilong ol.

Nau em i sanap longpela taim pinis na em i les olsem na em i sindaun. Em i kirap nogu tru bikos olgeta 80 dok i sindaun na lukluk long em. Taim em i slip, olgeta i slip. Taim em i pasim ai, olgeta i pasim ai na slip.

Dispela samting i mekim em i amamas tru long stap long dispela stua, bikos i no gat wanpela dok i kros long em.

Amamas i pulap tru insait long em, olsem na em i tok, **'maski long baim mira bilong mi yet. Mobeta mi go bek na sapos mi no amamas stap long ples, bai mi kam bek na stap wantaim 80 gutpela na naispela pren bilong mi long hia.'**

Olsem na em i kirap long slip, na wokabaut i go bek, na em i lukim olgeta dok insait long mira tu i kirap na wokabaut i go. Taim em i stop na tanim bek long lukim ol, olgeta i tanim bek na lukim em tu.

Em i go bek long ples. Na planti taim moa em i go bek long dispela bikpela stua na lukim em yet insait long mira. Bikos em i amamas tru.

Laspela pikinini long The Sound of Music i dai

... Bin wok misinari long PNG

Veronica Hatutasi i raitim

WANPELA biknem singa long musik muvi planti long yumi i save long en na lukim tu, em "The Sound of Music" na bihain em i kamap wanpela lei misinari na wok long PNG, i dai pinis.

Maria Von Trapp bilong Von Trapp musik famili husat i bin singsing na ekt wantaim 6-pela pikinini i gat long en 4-pela pikinini meri na tupela pikinini man long 1959, i bin dai long las mun long ples bilong famili em long Vermont, Amerika.

Planti pipel long wol i laikim stret dispela musik muvi.

Lapun Maria Von Trapp i bin gat 99 krismas taim em i dai long slip bilong em long Februeri 18, 2014.

Stori bilong Von Trapp musik famili i bin stat long ples bilong ol, Austria, we papa bilong ol i bin wanpela bikman long nevi. Tasol em bin birua wantaim ol

Nazi ami bilong Jemeni, na ol i ronawe i go long Amerika long 1940's na sindaun long Stowe, Vermont long Amerika.

Olgeta 6-pela pikinini long namba wan meri i bin kamap long musik muvi i dai pinis na Maria em i las. Tripela tasol long namba tu meri papa i bin maritim taim namba wan meri i dai em ol i stap laip, wantaim ol bubu na kandere.

Hap we Von Trapp famili i kam insait long PNG i narapela stori.

Dispela em taim Maria Von Trapp i bin kam wok olsem misinari long PNG long ol yia long 1960's long ol ples olsem Milen Be, Sepik na Mosbi.

Wantok Niuspepa i bin toktok wantaim Sister Stella bilong Handmaids of the Lord (AD)Katolik kongrikese long Waigani, Nesenel Kapitel Distrik.

Em i wanpela long ol lain husat i bin bungim Maria Von Trapp taim em i wok olsem lei misinari long Ferguson Ailan,

Milen Be Provins.

Sister Stella we krismas bilong em i abrusim 60 yia nau, bilong Milen Be Provins i Mada Supiria bilong kongrikese long Pot Mosbi.

"Mi bin bungim Maria Von Trapp long 1963 taim mi yangpela gel i gat 16 krismas na mi skul long Sideia Ailan.

"Maria i bin wok olsem misinari long Budoya Katolik Misin long Ferguson Ailan. Em bin wok long hap samting olsem 4 na 5 krismas. Wanpela brata bilong em i save kam long Amerika long lukim em.

"Em i wanpela gutpela meri husat i save laikim ol narapela na mekim gut long ol. Em i save laikim musik stret na i save pilaim flut bilong em.

"Em i bin save lainim musik i go long ol yangpela mangi na meri.

"Maria i save helpim pater long pastorel na ministri wok na tu, long lainim ol yangpela long musik," Sister Stella i tok.



MARIA VON TRAPP

MUSIK FAMILI: Von Trapp family poto taim ol bin wokim The Sound of Music muvi. Ol Poto: i kam long Internet



Dispela bikpela demdem ol i kolim Giant African Snail i wok long bagarapim sindaun na laip bilong pipel long sampela hap bilong Not Guadalcanal long Solomon Ailan.

Wok painimaut long rait bilong ol asailam sika long Manus

Wanpela jas bilong Papua Niugini i stat long lukluk long pasin ol i mekim long ol asailam sika long ditensen senta bilong Australia long Manus. Wanpela asailam sika i bin dai na planti arapela i bin kisim bagarap long dispela senta las mun long taim trabel i bin kamap. Aninit long lo bilong PNG, suprim kot i ken askim long kamapim wanpela wok painimaut bilong em yet sapos i gat wari bilong human rait. Jastis David Cannings i bin mekim dispela bihain long ol trabel i kamap na wanpela asailam sika i bin dai na planti arapela i bin kisim bagarap. Em bai lukluk long ol kondisen long senta na sapos i bihainim stret rait aninit long mama lo bilong PNG na intenesenel tok orait bilong human rait. Jas Cannings i bin makim Paul Crouch wanpela saveman bilong Helt long Cairns, Australia long go glasim ol helt sevis long dispela senta. Em i askim olsem dispela dokta i mas gat tok orait long go lukluk long olgeta eria bilong senta. Jas Cannings yet bai i go lukluk raun long dispela senta long taim bilong dispela wok painimaut. Em i askim tu i mas gat helpim bilong lo i go long ol asailam sika pastaim long dispela wok painimaut i kamap. Las yia Jastis Cannings i bin givim oda long mekim wok painimaut bihain long sampela polisman i bin yusim ol naip long katim lek bilong 70 man bihain long wanpela traibel pait long Mosbi.

Asailam sika stori long pasin bilong Operesen Sovren Boda

Ol asailam sika em gavman bilong Australia i yusim fos long salim i go bek long Indonesia long laip bot i bin tokaut long wanem samting i bin kamap long ol. Na ol i laik bai i mas gat moa toktok long dispela pasin em i yusim long lukautim boda bilong Australia. Wanpela nupela video i kam aut nau i soim wok-about bilong ol i lain i laik kam long Australia, maski long tingting bilong Australia federal gavman long traime haitim dispela wok bilong em long salim bek ol asailam sika i go bek. Ol dispela pasindia husat i stap nau long ditensen senta long Indonesia i bin toktok wantaim 7.30 Karen Afeas Program bilong ABC. Ol i stori long ol gavman opisa i fosim ol i go antap long orens laip bot bihain long ol i holim ol long kastom sip Triton autsait long Kristmas Ailan inap long wanpela wik. Wanpela asailam sika bilong Iran Areash Sedigh, krismas blong em 35, i tok dispela i bin namba tu taim em i traime long go long Australia na ol i putim em long wanpela orens bot em gavman i bin baim long mekim dispela wok long salim ol i go bek. Mista Sedigh i tok taim ol i holim ol antap long sip Triton, ol i putim em long wanpela rum longwe long ol arapela pasindia bikos ol i no laik em i tokim ol olsem bai ol i salim ol i go bek long Indonesia. Em i tok ol opisa long sip i bin paitim em pastaim long ol i putim em i go insait long laip bot

Pasin bilong baim vot i stat long Solomon Ailan

Transperensi Solomon Ailan i tok em bai sekap long ol ripot i tok pasin bilong baim vot i stat nau long kantri. Sif Eksekutiv Opisa bilong Transperensi Solomon Ailan, Daniel Fenua i tok em bai lukluk long ol toktok i kamap olsem ol kendidet bilong nesanel ileksen i statim wok bilong kempein long baim ol vot. Ol nius i kam long Solomon Ailan i tok ol kendidet i wok long baim ID kat bilong ol pipel ol i kisim pinis aninit long dispela nupela baiometrik vota registresen sistem. Mista Fenua i tok ol i no mekimi wanpela wok painimaut long ripot ol i kisim long dispela samting. Em i tok ol i bin kisim sampela toktok i kam long ol pipel long dispela hevi taim vota registresen i bin kamap. Em i tok ol i harim olsem ol nupela kendidet wantaim sampela siting MP i bin kisim ol pipel long kar i go long registresen senta na taim pipel i rejista pinis ol MP na ol nupela kendidet i kisim ID kat bilong ol. Mista Fenua i tok long lukluk bilong em long ol ileksen bilong bipo dispela toktok i mas tru long wanem kain pasin olsem i save kamap bipo tu na em i no kirap nogut long harim ol kain toktok olsem. Wok bilong Transperensi nau em long mekim ol wok painimaut bilong em yet long lukim sapos ol dispela toktok i tru na wanem eksen ol bai mekim.

PNG LNG projek bai kamapim gas long mun Jun

Bikpela ExxonMobil likwifait neturel gas projek long Papua Niugini bai stat long salim gas i go long ol ovasis kantri long namel bilong dispela yia. ExxonMobil LNG plant long Sauten Hailans bai stat long salim gas i go long ol ovasis kantri long mun Jun 2014. Dispela wok projek i soim stret gro bilong PNG olsem kantri nau bai ol i salim gas i go long ol kantri long Asia na ol i ting dispela projek bai apim ikonomi long yia bihain i go antap long 20 pesen. Manesing dairekta bilong ExxonMobile PNG, em i save lukautim dispela projek, Peter Graham i tok dispela projek kamap hariap long taim bilong em i gutpela samting stret long lukim moa investmen long kantri long ol yia i kam. PNG LNG projek i bin hatwok wantaim sampela ol hatpela ol maunten eria long wol long kamapim ol paipain moa long 700 kilomita long Hailans, brukim Galp Provins i go kamap long Mosbi. Mista Graham i tok dispela projek i bin bungim tu sampela ol guria long graun, na ol tait wara, graun bruk na ol arapela hevi bilong ples wantaim tu ol wari bilong gutpela rot na transpot long kamapim kain bikpela projek olsem. Em i tokim Radio Australia dispela i bin gutpela nius stret long namba wan gas kago long 2014. Mista Graham i tok em i ting dispela bai bikpela de bilong olgeta pipel bilong Papua Niugini long lukim ol bikpela kago sip i kam insait long karim gas i go long ol kastoma bilong en.



GIVIM KI: Ol tisa, woklain na ol sumatin bilong Koiari Pak Edventis Hai skul i laki stret long kisim nupela 15 sita bas na tok tenkyu i go long NCD Gavana, Powes Parkop, husat i givim nupela bas long skul long dispela wik. Skul i autim bikpela tok amamas i go long gavana na tok bas bai helpim ol gut long ol wok bilong em. Kos bilong bas em K89,000 na gavana i yusim Provinsel Sapot Impruvmen Program (PSIP) fan bilong em long baim. Hia Mista Parkop i givim ki long han bilong wanpela sumatin lida. Poto: Lucy Kapi




OL MAUNTEN MANGI: Ol dispela yangpela mangi bilong ples Kalgowi, Westen Hailans Provins long Hagen lalibu seksen bilong Hailans Haiwe i karim gras ol i katim na pasim long wokim nupela famili haus. Poto: Henry Yamo



MEMBA YU STAP WE? Em i tripela yia nau bikpela raunwara long Rainbow Estet, Nesanel Kapitel Distrik i givim hevi long ol kar na ol manmeri na pikinini i stap long dispela hap bilong siti. Rainbow i stap long Mosbi Notwes na ol manmeri i stap long hap i askim wanem taim bai memba i stretim dispela hevi bikos ol i kisim taim stret.

Gutpela pablik yutiliti bai strongim ol bisnis na divelopmen long kantri



Planti bikpela projek na arapela divelopmen bai kamap long PNG insait long faivpela yia i kam.

Ol memba bilong palamen wantaim ol gavman minista na praim minista yet i wok long raun i go long brukim graun bilong statim ol dispela bikpela wok. Ol dispela bikpela wok i no kamap long siti na taun tasol, nogat. Long ol provins tu i gat ol bikpela egrikalsa projek na bikpela wok bilong sanapim ol bris na stretim rot na ol ples balus. Inap tupela wik nau ol pipel bilong Maprik na Yangoru Sausia ilektoret long Is Sepik i amamas long ol memba na praim minista yet i kamap na statim wok bilong bikpela egrikalsa projek. Na long ol arapela hap long kantri,

ol memba bilong palamen i bisi tru nau long baim ol trakta na dosa na ol trak na masin bilong stretim rot, sanapim ol skul na stretim ol klasrum na haus bilong ol tisa. Ol i stretim ol haus sik na helt senta na ol etpos long ples long helpim ol mama na pikinini. Bikpela mani bilong kantri i go long mekim ol dispela wok.

Orait, long eria bilong bisnis, i gat bikpela laik tru i stap nau long tingting bilong pipel long kamapim ol liklik na namel sais bisinis, ol SME. Las yia gavman i bin tokaut long strongim ol dispela kain bisnis na i putim bikpela mani i go long mekim dispela driman i kamap tru. Ol pipel tu i go long ol bikpela kibung bilong ol SME long kisim moa save na redi gut long

kamapim o skruim moa wok i go long ol liklik bisnis bilong ol. I gat bikpela singaut i go long ol meri bilong kantri long yusim dispela sans long kamapim bisnis na ol benk tu i kamapim program bilong helpim ol meri.

Gavman i mekim bikpela wok tru nau long kamapim ol wok divelopmen na mekim kantri i gro na i gohet. Long namel bilong dispela yia bai kantri i salim namba wan LNG gas i go long ol ovasis kantri long Esia. Bikpela mani bai kam bek long strongim wokmani bilong kantri. Dispela LNG projek em i bikpela samting na bai kamapim gutpela profit bilong PNG.

Tasol pastaim long ol dispela bikpela wok i kamap, yumi mas

stretim kantri na redi. I mas gat gutpela pawa saplai, i mas gat gutpela wara saplai, rot na ol bris i mas stap gut long ol kar i ran na ol sip i kam sua. I mas gat gutpela telekomunikesen we yumi ken salim tok i go kam long telepon, mobail na intanet. Ol dispela samting i mas stap na bai ol bikpela divelopmen projek i ran gut. I gat planti komplein i save kamap long ol ovasis investa na ol PNG bisnisman na meri tu olsem kost bilong wok bisnis hia em i antap tumas. Ol i tok olsem bikos i no gat gutpela servis bilong telekomunikesen, pawa, wara na ol rot, bris na ples balus, ol yet i spendim bikpela mani long baim jenereta na fuel bikos PNG pawa saplai i no gutpela tumas. Na

wankain stori tu long ol arapela pablik yutiliti servis em gavman i mas givim tasol planti taim em i feil long mekim. Na antap long dispela hevi em bikpela hevi bilong lo na oda insait long kantri. Sapos hevi bilong lo na oda i slek liklik bai ol bisnis i no inap long spendim bikpela mani tumas long kisim ol sekyuriti kampani long was long bisnis bilong ol, o sanapim ol bikpela kapa na waia banis raunim ples bilong bisnis na putim ol sekyuriti lait.

Bikpela askim i go long gavman nau long helpim ol dispela provins na ilektoret we ol bikpela divelopmen projek i kamap. Helpim ol long kamapim gutpela rot, bris na ples balus na pawa na wara saplai.

PNG i laki tru olsem yumi gat planti bikpela riva na gas. Watpo bai yumi no inap kamapim moa haidro pawa stesin o yusim gas tu long kamapim elektrik pawa? Ol divelopmen plen bilong 10-pela yia o 20 yia bihain i mas tok klia long dispela.

Bai yumi yusim yet ol lapun fuel jenereta o bai yumi lukluk long ol narapela rot bilong kamapim ilektrik pawa. Na bai olgeta ples insait long kantri i gat gutpela wara saplai o olsem wanem. Yumi toktok long salim paip wara i go long Australia, na yumi yet bai olsem wanem?

Dispela em sampela samting ol savelain bilong wokim divelopmen plen i mas skelim na ol politisen i mas harim na traime long bihainim. Planti taim ol politisen i no bihainim tok save bilong ol save-man bilong ol dispela wok na ol pipel i save kisim taim.

Sapos yumi laik lukim tru divelopmen i kamap, orait stretim ol rot, pawa, wara, bris na ples balus na telekomunikesen nau.

Obama tok amamas long Papua Niugini

“Amerika i amamas long wok bung wantaim Papua Niugini,” Presiden bilong Amerika Barack Obama i tok.

Nupela Embeseda bilong Papua Niugini long Amerika, Rupa Mulina i bung wantaim Presiden Obama long wik long Wait Haus.

Taim Presiden Obama i tok welkam long Embeseda Mulina, em i tok olsem dispela yia i makim strongpela yia bilong wok bung namel long Amerika wantaim Papua Niugini.

Dispela wok bung namel long tupela kantri i lukim \$A19 bilien invesmen bilong Exxon Mobil long PNG LNG Projek.

Dispela invesmen bai i lukim ol i karim ges long Papua Niugini i go long ol kantri long Not Is Esia.

Presiden Obama i tok dispela wok bung namel long tu-



Presiden bilong Yunaitet Stets ov Amerika, Barack Obama wantaim nupela Embeseda bilong Papua Niugini long Amerika, Rupa Mulina.

pela kantri i gutpela long wanem em bai strongim tupela

kantri long wok bung wantaim long taim bihain tu.

Presiden Obama i tok amamas long Papua Niugini long sapotim Extractive Industries Transparency Initiative.

Dispela program em wanpela intenesenel program na invesmen bilong Exxon Mobil long PNG LNG projek em i kam aninit long en.

Dispela program bai i lukim Papua Niugini i save gut long menesim ol risos long gutpela rot long intenesenel level.

Antap long dispela, Presiden Obama i tok amamas long Papua Niugini long ol wok kantri i wok long mekim long strongim ol meri long kantri, mekim awenes long HIV/AIDS na

Klaimet Senis.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500 Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga

Acting Editor Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



Program bilong Wanwan De

De - Mande - Fraide

6am - 10am - Sankamap show - Host: Kas.T
6:00am - Major Nius Bulletin
6:15am - Komuniti Notis Bod
6:25am - Taim Bifo - wanpela singsing blong bifo.

Tasol
9:30am - Final aua cruz
10am - 3pm - Morin Trek na Belo Pack
10:00am - Major Nius Bulletin - YUMIFM Nius Senta

2:00pm - Major Nius Bulletin - YUMIFM Nius
2:05pm - YU TOK - komiuniti awenes program
2:45pm - YUMI PANIM WOK Segment

6:10pm - 7:00pm Mon kamap sho
6:45pm - Komuniti Notis Bod
7:00pm - 9:00pm - COCA COLA GARAMUT

Sarere belo cruz - Host: Tuluvan Vitz
1pm - 2pm - Sarere Belo Taim Dedikesen
2:00pm - Nius - YUMIFM Nius Senta

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TUNDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TRINDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FONDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FRAIDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

SARERE - Nait
7PM Stesen op - Ol Nius Hetlain/Program Priviu
7.05PM Musik na Chit Chat

SANDE - Nait
7PM Stesen op - Ol Nius Hetlain/Program Priviu
7.05PM Musik na Chit Chat

Raun wantaim Wantok kru ...



51 bon de kek Foto: Josiah Kana.

Frieda Kana katim kek wantaim ol yut bilong Agape Intadinominesen Ministri Sios. Foto: Josiah Kana

Kaikai tok bilong God na bai yu stap yangpela yet

Frieda Sila Kana i raitim

LONG Sarere 15 Mas, mi winim 51 krismas na long namba wan taim long laip bilong mi, mi kisim liklik luksave long ol yangpela yut na ol pikinini bilong mi long tingim mama karim de bilong mi.

Planti krismas i go pinis mi no save mekim kain samting olsem tasol mi bin ting olsem dispela yia em i narakain liklik, bilong wanem mi kamap long hap namba long winim 100 yia. Taim yu kamap winim 40 yia, em yu statim laip tru nau. Tasol 51 krismas em i winim 40 ya. Mi mas 10-pela krismas nau o?

Namba wan samting mi bin laikim long dispela de, em mi bin laik grisim ol yangpela yut bilong Agape Intadinominesen Ministri, long kam long yut felosip long Sarere. Olsem na mi promis olsem, em i bon de bilong mi na

husat i kamap bai em i kaikai kek na sosis. Em nau, kek na sosis i mekim na ol yut na sampela mama papa i kam long Sarere.

Mi kisim wanpela baibel kwis wantaim ol yut, na bihain ol tim i lus i go wokim paia bilong kukim sosis long kaikai wantaim kek. Liklik kodiell wantaim wanpela kek i go em olgeta lain i bel pulap stret.

Mi gat 4-pela pikinini tasol long dispela de, tupela las pikinini tasol i stap long selebretim 51 yia bilong tingim mama karim de bilong mi.

Tasol mi no gat wari tumas, bilong wanem mi bin gat bikpela amamas tru long selebretim de bilong mi insait long haus bilong God wantaim ol pikinini i laikim God na i laik painim em insait long haus bilong em.

Bihain long katim kek, ol yangpela na sampela lida na Pasto i mekim sampela toktok em i mekim mi kirap nogut long harim

ol gutpela toktok ol i mekim long mi na mi kisim bel isi na amamas tru.

Bikpela samting em mi harim tupela pikinini bilong mi yet, Josiah na Deborah i tokaut long mi wanem kain mama long laip bilong tupela. Tupela wantaim toktok na ol i rausim ai wara tu.

"Mi tenkim God long givim mi wanpela gutpela mama olsem.

Em i save helpim mi na lukautim mi long olgeta samting mi nidim long em," Deborah i tok.

"Mi laik tok tenkyu long mama bilong mi i save lainim mi long Tok bilong God na long gutpela pasin. Planti ol pren na wanskul bilong mi i save laik lukluk long mi na bihainim mi long givim ol gutpela tingting na toktok long mekim gutpela pasin. Ol dispela pasin em mi save lainim long mama bilong mi tasol. Tenkyu mummy," Josiah i tok.

Pasto Daniel Hewali i lukim tu-

pela pikinini i kra i na toktok na em i tok, "Dispela em i soim olsem, ol dispela pikinini i laikim tumas mama bilong ol. Ol i lukim trupela laip long em na ol i ken tokaut long pablik olsem. Planti papa na mama i save giaman long soim gutpela pasin long ausait, tasol insait long famili ol i narapela kain. Ating mipela sampela papa na mama bai lainim pasin long yu tu."

Planti yangpela i kirap nogut long lukim namba 51 i sanap antap long bon de kek bilong mi. Ol i tok, "mama, yu no luk olsem 51 ya!"

Na mi tok, Em nau. Taim Jisas i stap insait long yu, glori bilong God bai i sain antap long yu na bai yu stap yangpela yet long mekim wok bilong em long ples graun.

"Bai mi skruim laip bilong ol i go longpela olsem prais bilong ol..." Buk Song 91:16a

EMTV Television Guide

FONDE MAS 20, 2014

4:30 AM G AUSTRALIAN NETWORK
5:00 AM G JOYCE MEYER 1070.4
5:30 AM G EMTV NEWS REPLAY
6:30 AM G TODAY
9:00 AM G CLASSROOM BROADCAST

RESOURCE PNG Ep#10

9:00 pm G SOKAXTRA EP#11/2014
9:10 PM G HOT SPOT EP#11/2014
9:30 PM PG ELITE MUSIC ZONE EP#2014/09
10:00 pm PG NRL FOOTY SHOW - EP#03
11:30 PM G NEWS REPLAY

FRAIDE MAS 21, 2014

4:00 AM G AUSTRALIAN NETWORK
5:00 AM G JOYCE MEYER 1070.5
5:30 AM G EMTV NEWS REPLAY
6:30 AM G TODAY
9:00 AM G CLASSROOM BROADCAST

Grade 8 Maths

01:00pm - Grade 8 Maths
01:50pm - Grade 8 Science
02:30pm - DEP (I)
4:30 PM G KIDS KONA
5:00 pm G THE SHAK SERIES 3 EP#6/42
5:30 PM G SKIPPY THE BUSH KANGAROO-CRIME STOPPERS
6:00 PM G EMTV NATIONAL NEWS
7:00 PM G IN MORESBY TONIGHT - 2014 - NRL ROUND 3
9:30 PM G 2014 - NRL ROUND 3
11:30 PM G EMTV NEWS REPLAY

SARARE MAS 22, 2014

4:30 AM G AUSTRALIAN NETWORK
6:00 AM G EMTV NEWS REPLAY

IN HIS STEPS EP#11

7:30 AM G AUSTRALIAN NETWORK
8:30 AM G AMAZING SPIES - EP#18Rpt....
9:00 AM G ESCAPE FROM SCORPION IS
9:30 AM ULTIMATE GUINNESS WORLD
10:00 AM G TRAPPED CASTAWAY EP#18/30
10:30 AM G SKIPPY -Rpt.
11:00 AM G AUSTRALIA NETWORK
3:30 PM G 2014 - NRL ROUND 3
5:30 PM G OLSEMWANEM EP#10
6:00 PM G EMTV NATIONAL NEWS
6:30 PM 2014 - NRL ROUND 3
8:30 PM G SKUL BILONG YU - Ep# 2
9:30 pm G 2014 - NRLROUND 3
11:30 PM G NATIONAL EMTV NEWS REPLAY

SANDE MAS 23, 2014

3:30 AM G AUSTRALIA NETWORK

EMTV NEWS REPLAY

6:30 AM G IT IS WRITTEN 7024
7:00 AM G HILLSONG991
7:30 AM G AUSTRALIA NETWORK
8:00 AM G YOGA CITY re-run EP#3/13
8:30 AM G BUSINESS PNG YR.3 #9 Rpt.
9:00 AM G TBA
9:30 AM G OLSEM WANEM EP#10 - Rpt.
9:30 AM G RESOURCE PNG EP#10 Rpt.
11:00 AM G LOVE BITES WITH JOEY 5/26
11:30 AM G ITALIAN FOOD EP#05/13 Re-run
12:00 PM G AUSTRALIAN NETWORK
4:00 PM G 2014 - NRL ROUND 3
6:00 PM G EMTV NATIONAL NEWS
6:30 PM G TOKPIKSA EP#2014/11
7:00 PM G 2014 - NRL ROUND 3
RAIDERS vs. TITANS
9:00 PM G 60 MINUTES
10:00 PM MAO SUNDAY NIGHT
11:30 PM G HILLSONG991 Rpt..

TORO



BIABIA



KANAGE



KROSWOD

- | | | | |
|-------------------------------------|--|-------------------------------------|----------------------------------|
| Antap | 33 Pipia graun | 4 I no aut | 29 Pas long han bilong diwai |
| 1 Plisman | 35 Leta | 5 Liklik tasol | 30 Kuk pinis |
| 6 Klinim bodi long wara | 36 Yunaitet Nesen | 7 Kolwara i kamap strong | 33 Sutim bel |
| 11 Painapol | 37 Nupela provins | 8 Wanem hap? | 34 Ples bilong dring |
| 12 Kikai bilong kai ba | 40 Plet bilong kap | 9 Samting bilong pait | 37 Skruim |
| 14 Ples i pulap long samting | 41 Hetman bilong daiosis long Katolik Sios | 10 Bikpela mani tumas | 38 Ples san kamap |
| 16 Bilong mekim musik | 42 Ilektoret long Hailans | 13 Bilas bilong het | 39 Solwara i kirap |
| 17 Bikpela riva long PNG | 43 Pas | 14 Noa i wokim dispela bot | 40 Nus i toksave long en |
| 19 Olpela Praim Minista bilong Fiji | 46 Nem bilong man | 15 Ol soldia | 41 Putim long bret |
| 21 Arapela lain | 48 Makim kendidet | 16 God i wokim man long en | 42 Go pas long kot |
| 22 Namba faiv mun | 50 Maketim | 18 Nem bilong meri | 44 Namba wan meri |
| 23 Wanpela diwai | 52 Taun long Is Nu Briten | 20 Nem bilong meri | 45 Nem bilong man |
| 24 Yu yet | 55 Wanpela diwai | 24 Jisas i wokim ol dispela samting | 47 Sop paura bilong wasim klos |
| 25 Liklik pis | 56 Pairap nabaut | 25 Wanpela kain ragbi gem | 49 Taim wara kol na kamap strong |
| 28 Prut | Daunbilo | 26 Taun long bikples Bogenvil | 51 Begin |
| 30 Tenkyu | 1 Draiva bilong balus | 27 Yau | 53 Wankain olsem 36 |
| 31 Pandanas | 2 Pawa i ran | | 54 Ol rul |
| 32 Ailan long Nu Ailan | 3 Binatang bilong gras | | |

SUDOKU

6	3	9	4	7	8	5	1	2
7	5	4	1	2	9	8	3	6
8	1	2	5	6	3	7	4	9
1	4	5	8	9	7	2	6	3
3	2	8	6	5	4	1	9	7
9	6	7	3	1	2	4	8	5
5	8	3	7	4	6	9	2	1
2	7	6	9	8	1	3	5	4
4	9	1	2	3	5	6	7	8

Ansa bilong las wik Sudoku # 36

6		8	5	1		2		
4			2		3		8	
7			8			5		
	6				7		9	2
				8				
8	3		9				7	
		4			1			3
	1		4		9			8
		9		3	8	1		5

Ansa bilong Sudoku # 37 neks isu

	K	A	I	K	A	I		M	O	S	E	S			
H		I	N	A	P		W	O	K	I	M		K		
E	G		D	R	I	M	A	N	O		T	U			
L		P	E	I	M		N		S		A	S			
A	T	A	P				S	T	I	L		H	I	A	
			S	E	M		T	O		A		A	M	I	
S	O	N					O	K	T	E	D	I	M		
T	S	D	A	R							E	T	A		
A	S		E		L	I	H	I	R				N		
O		N	I	O									G	A	N
B	R	U	S				B	L	E	S	I	M	R		
S	I			G	A	R	A	M	U	T		T	I		
P		S	I	A	M	A	N		G	A	N		P		
		S	A	N	T	A			K	A		E	N		

Ansa bilong las wik kroswod, isu # 2062

1	2	3	4	5	6	7	8	9	10
11								12	13
					14		15		16
		17	18				19	20	
21			22			23			24
		25			26	27		28	29
	30			31				32	
33							34		35
36			37	38				39	
		40						41	
42					43	44	45		
		46	47			48			49
50	51				52			53	54
				55				56	

EMTV Television Guide

12:00 AM G NATIONAL EMTV NEWS followed by the Australia Network	3:30PM G KIDS KONA 5:00 PM G THE SHAK S3 EP#2/42 5:30 PM G AMAZING SPIES - EP#14/26 5:55 PM G CRIME STOPPERS 6:00 PM G EMTV NATIONAL NEWS 7:00 PM G NRL 2014 ROUND 2 BULLDOGS vs SHARKS 9:00 PM G COCA-COLA SPORTS SCENE EP 9:30 pm PGR NEW GIRL S1 - EP#23/24 10:00 PM G EMTV NEWS REPLAYfollowed by the Australia Network	9:00 AM G CLASSROOM BROADCAST 09:00am - Grade 6 Science 09:50am - Grade 6 Maths 10:40am - Grade 7 Maths 11:20am - Grade 7 Science 01:00pm - Grade 8 Maths 01:50pm - Grade 8 Science 02:30pm - DEP (I) 3:30PM G KIDS KONA HI 5 S9 EP#23/45 DORA THE EXPLORER S4 EP#15/25 PYRAMID S2 EP#6/68 5:00 pm G THE SHAK S3 EP# 3/42 5:30 PM G ESCAPE FROM SCORPION IS 6:00 PM G EMTV NATIONAL NEWS 7:00 PM G HAUS& HOME Ep#06 8:00 PM G BUSINESS PNG YR.3 - 8:30 PM G GREAT ANIMAL ESCAPES - 9:00 PM PGR MERLIN S2 - Ep#9/13- 10:00 PM G NEWS REPLAYfollowed by the Australia Network TRINDE MAS 19, 2014 5:00 AM G JOYCE MEYER 1070.3 5:30 AM G EMTV NEWS REPLAY 6:30 AM G TODAY 9:00 AM G CLASSROOM BROADCAST 09:00am - Grade 6 Science 09:50am - Grade 6 Maths 10:40am - Grade 7 Maths 11:20am - Grade 7 Science 01:00pm - Grade 8 Maths 01:50pm - Grade 8 Science 02:30pm - DEP (I) 3:30PM G KIDS KONA 5:00 PM G THE SHAK Series 3 Ep#4/42 5:30 PM G ULTIMATE GUINNESS WORLD	5:57 PM G CRIME STOPPERS 6:00 PM G EMTV NATIONAL NEWS 7:00 AM G FACT FILES - Alert: Threatened 8:00 PM G OUR PORT MORESBY EP#21 8:30 PM G TOKPIKSA Ep#11- Repeat.... 9:00 PM PGR HOSTAGES S1 - EP#13 10:00 PM G NEWS REPLAYfollowed by the Australia Network
--	--	---	--	--

Ol Progam na Kilok i ken senis oltaim...



Teksim Wari, Tingting, Painim Pren, Wantok o Pas bilong yu i kam nau..
Digicel namba: 7235 6149

Raun wantaim Kanage olgeta wik

Kastom

WANPELA moning meri bilong Kanage laik go long maket long Dagua na em tokim Kanage, 'plis naispla man bilong mi nogat makmak bilong yu. Mi bai go long maket long salim buai bilong mi na bai yu was long liklik Vero na stap long haus. Olgeta samting mi wasim na hangamapim long lain i stap. Sapos ren i pundaun yu rausim ol klos i stap long lain. Gel tekov pinis long maket na bikpela ren i pundaun. Kanage rausim ol klos bilong em wantaim pikinini na i no rausim pens bilong misis. Apinun nau na meri bilong Kanage kam bek na lukim olsem bikpela ren stret long ples, em kam daun long PMV na rot stret long haus na lukim olsem Kanage i no rausim pens bilong em long lain. Em i belhat na bikmaus antap long Kanage, 'mekim wanem na yu no rausim pens bilong mi long lain?' na Kanage tokim em 'plis em kastom ya. Hau bai mi holim pens bilong yu?' Meri bilong em kirap na tokim em olsem, "san na yu tok kastom, nait husat dispela masalai pukpuk save kaikaim long tit na pulim rausim?"

Kevin Penias
E S P



Yupela i no mangi moa

KANAGE i gat tupela pikinini man. Tupela wantaim i marit na stap wantaim papa na mama bilong tupela. Wanpela taim, Kanage i spak nogut tru na kamap long haus. Em singautim tupela pikinini man bilong em na meri bilong tupela i kam bung. Em nau Kanage i tokim ol olsem: 'Sori tupela pikinini bilong mi, mi laik toksave long yupela olsem em i no gutpela long yumi olgeta i stap long wanpela haus tasol. Yu tupela marit pinis na yu tupela mas wokim haus bilong yupela na stap long em nau. Mi wantaim mama bilong yupela i les pinis long harim kain kain nois bilong guria yupela save wokim long nait. Em samting bilong sem yah. Long wankain taim, em i no gutpela long yupela harim ol kain kain nois mi wantaim lapun bilong mi wokim. Yupela i no manki moa. Yupela i save olsem taim bikpela guria i kamap, haus i

save mekim nois ya. olsem em i moa gutpela long yu tupela i mas wokim haus bilong yupela yet'. Tupela pikinini man bilong Kanage em sem long toktok bilong papa bilong ol na kisim ol samting bilong ol na go stap wantaim ol tambu bilong ol.

Andrew Luh Dhai
Angoram

'About three weeks ago!'

Lapun Kanage em bilong Salamaua long-Morobe Provins. Wanpela moning em i go limlimbur long Voco Poin nambis long Lae. Em lukim wanpela waitman wet i stap long kisim bot i go long Salamaua. Waitman ya i no save long hamas aua bai bot kisim long go kamap long Salamaua, olsem na em askim Kanage, "Excuse me, how long does it take to travel from Voco Point to Salamaua?" Lapun Kanage bekim, "About three weeks ago!" Waitman ya laik lap tasol em strongim bel na askim em gen, "Sir, I am not asking about the days, but the time?" Em nau Kanage tok, "About one long wan!"

Voco Poin
Lae

Ol skwat! Teksim ol gutpela Kanage tok pilai i kam long: Txt: 72356149

Ol poroman i tok pilai tumas long mi bikos mi patpela tumas

Dia Laipain,

MI traim planti rot long traim lus weit o lusim skin bikos mi patpela tasol em no wok. Mi wokim planti eksasais, kisim marasin long kemis, yusim ol kanaka marasin, no kaikaim ol gris kaikai, wok nait, smuk planti na daunim mak bilong wara mi save dring long en.

Ol poroman sumatin i tok pilai tumas long mi na mi pilim sori. I gat narapela rot o ol narapela marasin i ken helpim mi long lusim skin na stap bun?

Desperate to Loose Weight

Dia Pren

Mipela i luksave olsem yu no amamas na yu no pilim gut, moa yet, taim ol narapela man meri i tok pilai long yu olsem yu patpela. Yu mas save pinis olsem sampela lain i save hariap long kamap patpela na sampela em bai nogat, maski ol i kisim planti kaikai. i luk olsem yu stap long nambawan grup na i min olsem yu mas mekim samting long lusim skin, o yu no ken putim moa skin.

Yu tokim mipela long planti ol samting yu save wokim long lusim skin. Dispela em ol gutpela tingting, tasol i gat sampela samting mipela i no wanbel wantaim.

Pastaim, yu tok yu stopim yu yet long dringim planti wara. Mipela i luksave olsem dispela i no gutpela samting long yu mekim long en. Yu no nap go patpela taim yu dringim planti wara. Bodi bilong



yu i save yusim planti wara bikos em i nidim em na dispela em i no yusim em save rausim olsem pispis. Ol dokta i tok planti manmeri i no wok long dringim inap wara insait long wanwan de. Wanpela man i sapos long dringim 8-pela glas wara long wanpela de.

Long keis bilong yu, i gutpela long yu i dringim moa wara bikos dispela bai helpim yu long klinim bodi na ol pipia samting yu no nidim long en. Olsem i gutpela yu bihainim edvais bilong dokta na dringim 8-pela kap wara olgeta de.

Narapeal samting yu tok yu mekim em yu smok planti i stap. Sapos yu save smokim moa long 20 sigaret long wanpela de, yu gat bikpela sans long kisim lang kensa. Tasol yu ken kisim tu sapos yu no smokim planti sigaret. Mipela i bilip olsem yu bai lusim smok olgeta.

Yu eksasais planti na dispela em i gutpela sapos yu wokim rait eksasais. Mipela i askim yu long go long wanpela ples bilong eksasais na toktok wantaim bos long dispela ples long wanem kain eksasais i gutpela long yu.

Yu tok yu save kisim ol tablet marasin, tasol yu no tok wanem kain stret. Yu

askim mipela tu long tokim yu long wanem kain marasin yu ken kisim, tasol mipela i no ol rait lain long tokim yu. Yu mas go lukim dokta bikos em bai skelim na glasim yu gut na givim yu ol rait edvais long mekim wanem samting, na long kisim ol rait marasin. Em bai wokim ol tes long lukim as long yu go patpela na rot we yu ken bihainim ol program long lusim skin.

Pren, i luk olsem yu traim planti samting long traim lusim skin, tasol bodi bilong yu i no senis yet. Sapos yu wok long mekim eksasais na kaikaim ol rait kaikai, noken wari long ol toktok ol narapela manmeri i wokim. Yu traim hat long mekim stretpela samting long lusim skin. Ating Bikman i mekim yu olsem o, sapos yu man bilong laikim stret kaikai, tasol go het long ol program na ol samting yu wokim long lusim skin.

Pren bilong yu

Sapos yu gat wari, rait i kam long Lifeline, P O Box 6047, Boroko, NCD. Telipon: 3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.

Laipain

Dia Wantok Niuspepa, mangi Moko mikis bilong Langs Meto. Mi save laik tru long ritim Wantok Nius. Mi wanpela nupela ilektet wod kaunsel long Kapao LLGC Aseki Men.

10/03/2014

Dia Wantok Nius, nem bilong mi Linda Siau Hikor. Mi bilong Wes Kerema (Ihu) na mi marit long Simbu – Kerowagi. Mi lus kontek wantaim ol lain bilong mi long Mosbi na Kerema. Plis ringim mi long dispela namba 7208 9077 na mi ken stap wantaim yupela.

Tenkyu, Linda -

Dia Wantok Niuspepa, mi wanpela man bipo wok olsem kiap o patrol opisa, i gat save long wok bilong gavman na pablik edministresen. Interes lain yu ken ringim mi long namba 7330 5164 o 7612 2898. Tenk yu, Wantok.

Dia Wantok Nius, mi laik soim bel hevi na wari bilong mi long Madang Provinsal Gavman wantaim Open memba bilong Raikos. Olsem wanem na ol no gat luksave long mipela. Tenk yu!

Dia Wantok Nius, Wantok Niuspepa i olsem gutpela sevis long yumi ol lain i no save long tok Inglis. Em tasol na husat i laik sapot yu welkam.

Albert Ake, WHP -

Dia Wantok Niuspepa, mipela papa mama bilong Begesin long Madang provins i no amamas long wanem Brahman sekenderi skul i no save kisim stret ol pikinini bilong Usino Bundi na Gama i go long Braaman. Em i save kisim ol Katolik pikinini bilong arapela distrik tu i save i go skul long Brahman sekenderi. Dispela pasin ol i stret, mipela i askim gavman long kirapim wanpela haiskul long Begesin na dispela i ken helpim olgeta pikinini bilong Usino Bundi na Gama stret. Mipela i askim Upper Ramu distrik DA wantaim edministresen tim bilong em long lukluk long dispela wari bilong mipela. Tenk yu!

Ezekiel Tai Ono, Begesin -

Dia Wantok Nius, mi laik soim bel hevi na wari bilong mi long Madang Provinsal Gavman wantaim Open memba bilong Raikos. Olsem wanem na ol no gat luksave long mipela. Tenk yu!

Dia Wantok Nius, mi salim bel hevi bilong mi go long ol memba olsem gavana Powes Parkop tok long buai ban long NCD long TV. Mi lukim ol memba na ol man wan wok long kaikai na toktok long TV ya ol waitman tu was long Tv na lukim kantri stap. Man mi lukim long TV ol memba ol i laik toktok long ol pipel maus bilong ol i ret tru. Powes i no stopim ol. Yupela giaman long palamen i stap. Em tasol, tenk yu!

Mulange Samu -

ICCC bai rausim ol samting i no gat tok save long Inglis

INDIPENDEN Konsuma na Kompetisen Komisen (ICCC) i tok save pinis long rausim olgeta samting long stua em i no gat tok save long tok Inglis.

Ol konsuma o kastoma i save bringim bel hevi bilong ol i go long ICCC Olgeta taim, long ol samting olsem ol toi bilong pikinini, ol klos na kaikai long ol stua i no gat tok save long tok Inglis. Komisen i gat bikpela wari olsem ol lain i baim samting i no gat save long wanem samting i stap insait long karamap na sapos ol i kaikai o yusim bai em i ken bagarapim ol. Sapos kaikai, em ol lain i baim bai i no save long we bilong redim na lusim hap bilong kaikai long bihain.

ICCC i tokaut long tingting bilong en aninit long Nesenel Geset Namba G55, long 20 Februari 2014, long stopim olgeta kaikai i no gat tok save long Inglis long wanem em i ken kamapim birua long ol lain i baim na kaikai.

Komisina bilong ICCC na Sif Eksekutiv Opisa, Dokta Billy Manoka i tok, "Sapos ol konsuma o kastoma i no inap long ritim bikos em i stap long narapela tokples ol i no klia long en, ol bai i no save sapos em i no gutpela long bodi bilong ol, na ol inap kisim sik o sampela hevi long bodi. Yu no save wanem samting i wok long go insait long bodi bilong yu."

"Mipela i lukim olsem em i bikpela samting long lukautim sefti bilong ol lain bilong yumi. Komisen bai raun na lukluk long ol stua i bihainim dispela lo," Dokta Manoka i tok.

Dispela tambu i bihainim ol lo bilong Wol Helt Oge-naisesen i kamapim bilong strongim Nesenel Fud Sefti sistem.

Wanpela bikpela hap bilong dispela samting insait long lo bilong WHO em long gavman long kamapim sampela mak bilong ol i putim antap long ol kaikai long banisim ol kastoma i no ken



Dokta Billy Manoka.

kisim bagarap.

Insait long PNG i gat pinis Fud na Senitesen Ekt 2007 na em i tokaut klia olsem olgeta kaikai long stua i mas gat tok save long Tok Inglis.

ICCC i salim pinis wanpela singaut i go long ol lain i save salim samting i no gat tok save long Inglis, long kamap long bung wantaim ol sapos ol i laik toktok moa long dispela tambu.

Ox & Palm Promosen i makim wina

HUGO Canning Kampani i mekim dro bilong Bek to Skul Promosen bilong ol long las wik taim ol i makim 5-pela wina bilong Ox & Palm. Dispela promosen i bin stat long Desemba 18, 2013 i kami nap long Fraide 14 Mas. I gat planti lain i bin salim ol entri bilong ol i kam long Ox & Palm. Tasol Hugo Canning inap long makim 5-pela wina tasol makim wan wan rijon bilong kantri.

N.C.D, Sauten, Momase, Islands na Hailans Rijon i bin kisim wan wan wina. Wan wan wina i bin kisim wanpela nupela Acer 15 ins Leptop long helpim ol long 2014 skul yia bilong ol.

Nem bilong ol wina em Julieanne Hasing bilong Jubilee Catholic Sekendri Skul long NCD, Indira Millan bilong Sogeri Nesenel Hai Skul i makim Sauten Rijon, Elizah Lame bilong Kusbao

Praimeri Skul long Madang i makim Momase Rijon, Polaiap Selan, bilong Lonrengau Is praimer Skul long Manus Provins i makim ol Niugini Islands Rijon na Lyn Ania bilong Gom Praimeri Skul long Kundiawa, Simbu Provins i makim Hailans Rijon.

"Dispela em wanpela promosen bilong Ox & Palm Bren bilong Hugo Canning," Janelle Maniha, Ox & Palm Promosen Kodineta i tok.



Janelle Maniha, Hugo Canning Ltd Promosens Kodineta (R) na Polis Konstabel Paul Gene (R) Konstabel Gene i was taim Janelle i pulim nem bilong ol wina.

Ramu 2 Haidro Projek i kirap wantaim IPBC

INDIPENDEN Pablik Bisnis Kopesen (IPBC) bai helpim Ramu 2 Haidro pawa projek long kirap. IPBC na Webster Drillers i sainim wanpela kontrak i no longtaim i go pinis, long statim bilong ol wok bilong ensinia long Yonki, isten Hailans Provins.

IPBC i bihainim tok orait bilong NEC long kamap ejensi bilong go pas long nupela

Ramu 2 Haidro pawa projek. Em bai saplaim namel long 140 na 180 mega wat pawa, i go long Ramu grit long bringim pawa i go long Lae, Madang na long ol taun bilong Hailans Rijon.

Dispela Haidro pawa projek em bai stap aninit long IPBC tasol teknikel sapot bai i kam long PNG Pawa na i bringim gutpela helpim i kam insait

long rijon. Projek em i gat disain bilong holim hevi bilong pawa long taim moa ol haus lain na bisnis i kisim na yusim pawa long Lae na Hailans rijon.

IPBC i putim wanpela tenda na Webster Drillers i winim long kisim wok long man mak bilong K8 milien. Geo-tech stadi bilong em bai i gat 13 dril hul insait long 7

kilomita longpela hul o tanel long mekim isi long ol Geo-Tech speselis, Douglas Partners, long mekim wok bilong eksplorasen aninit long graun tasol i no go daun tumas.

Geo-tech wok painimaut em bilong luksave long wanem kain samting nogut o gutpela samting long sosel na envairomen bai kamap. Dispela wok painimaut bai i

pinis long 2014 na komesel/fainensel wok painimaut bilong projek bai stat long las tripela mun bilong 2014.

Parsons Brinkerhoff i go pas long wanpela grup bilong ol konsalten kampani we ol IPBC i baim, long mekim ful stadi bilong teknikel, sosel na envairomen. Dispela projek bai bringim planti gutpela

senis long hap we pawa bai i stap long en. Ol manmeri bai i ken wok, na tu ol ples na taun wantaim bisnis bai i gat gutpela pawa saplai.

IPBC olsem projek menesa bai kisim ol asples lain long wok leba na long wok sekyuriti. Dispela bai mekim ol ples lain i kisim gutpela helpim klostu tasol long ples.



Proper maintenance is a big deal. So here's a deal to make it easier...

20% OFF | **THE WORKS**™ CAR CARE PACKAGE

For a limited period you can get an oil change, tyre rotation, a fluid top-up and a comprehensive 27-point inspection carried out by our qualified Ford mechanics.

Only at **NIU FORD** and only until March 31, 2014.

To receive your 20% off voucher, visit www.fordconsumer.com, then contact **NIU FORD** to book your service.

Ford NIU FORD

Port Moresby: 325 5788 | Mount Hagen: 542 2100
Lae: 472 4733 | Kolopo: 982 8514

Ford

Go Further

CPL i mekim bikpela moa mani long 2013

CITY Pharmacy Limited, (CPL), wanpela bikpela ritel stua long kantri i tokaut long profit mani ol i mekim long 2013 em i winim mak bilong 2012.

Long wanpela tok save pepa bilong Siaman bilong CPL Grup, Mahesh Patel, em i tok CPL i win stret long holim yet ol maket sea bilong en long banisim ol mani bilong bisnis bilong ol wantaim 9 pesen moa mani ol i kisim long ol samting ol i salim long 2013.

Maski ikonomi bilong kantri i go daun liklik long 2013, City Pharmacy Ltd Grup, inap yet long kisim K388.72 milien long ol stua bilong ol, i winim K357.21 milien bilong 2012.

Grup sea prais bilong CPL i kamap strong tu insait long sea maket na i soim em i go antap 26 pesen wantaim K1.96 i winim K1.55 long Desember 2012.

Ol ritel stua bilong ol long olgeta hap bilong kantri i kisim taim liklik na i no mekim bikpela mani tumas, tasol CPL Grup em i gat bilip yet long mekim gut insait yet long 2014. Olsem na CPL Grup i



Nupela CPL Waigani Central stua.

go het long opim nupela projek wantaim bikpela soping kompleks long Mosbi ol i kolim 'Waigani Central' long pinis bilong dispela mun. Em bai gat ol stua olsem City Pharmacy, Stop N Sop,

Paradise Sinema na nupela 'Yu Yet Mekim' stail bilong stua ol i kolim Haus Depo.

Winmani i bin go antap long 9 pesen long ol sels, tasol net profit pastaim long ol i rausim takis i bin pundaun i

go long 12.25 pesen long K23.89 milien long pastaim mak bilong K27.26 milien. Dispela em bikos long nupela Eagle Boys Pizza i kamap long namba 3 kwota bilong 2013 olsem na ol profit bilong

em i no go insait long mak bilong yia. Long wankain taim Hadwe Haus i lusim mani bikos menesmen i no bin gutpela tumas, olsem na CPL i go tekova na ranim stua gen long stat bilong 2014.

Ol bot bilong CPL i wanbel long baim ol dividen long 7 toea wan wan sea long mun Me na Ogas long wankain mak tasol, bihain long tok orait bilong AGM long Epril 28.

Air Niugini Fokker 100 kisim biknem

PRESIDEN bilong Fokker Sevis, Peter Somers i tok amamas long Air Niugini long bikpela wok bilong ol long apim standed bilong Fokker 100 balus.

Dispela toktok bilong Mista Somers i bin kamap long wanpela konpres bihain long presentesen bilong Jenerel Menesa Ensiniaring bilong Air Niugini Tahawar Durrani long Netherlands.

Mista Durrani i bin toktok long gutpela pefomens bilong Air Niugini Fokker 100, histori bilong en, ol bikpela salens o hevi we em i save bungim, na ol rot long abrasim ol hevi na salens long mekim kamapim gut Air

Niugini Fokker 100.

Mista Somers i tok em i amamas tru long harim olsem Air Niugini Fokker 100 i gat hai standed, na i wok long go het wantaim ol gutpela wok long kamap gut moa.

Em i tok Fokker Sevis bai i helpim na sapotim Air Niugini long nau na long taim bihain tu.

Presentesen bilong Mista Durrani i bin opim ai bilong ol opereta bilong Yurop, na tu, sampela ol opereta na evieisen kampani bilong wol.

Wanpela samting insait long dispela presentesen we i bin mekim ol manmeri long dispela bung i kirap nogut

em ol operesenel salens we Air Niugini Fokker 100 i save bungim long Papua Niugini.

Presentesen i tok olsem Papua Niugini i gat ol planti bikpela maunten, ol ples balus i stap long ol ples we i gat hai altitut, na tu, klaimet bilong kantri i save senis planti taim. Dispela i save mekim operesen i hat tru.

Ol opereta husat i bin stap long dispela bung i amamas tru long Air Niugini Fokker 100 long wok strong taim i bin gat planti kain kain salens.

Na long dispela as, Mista Somers i tok Fokker sevis bai i helpim Air Niugini long apim standed moa yet wan-

taim nupela teknoloji, na ol balus bilong Air Niugini bai i kamap gut moa long sevim ol pipel.

Air Niugini i gat 7 Fokker 100 balus we i save flai long domestik na intenesenel level.

Dispela bung i bin lukim moa long 200 eksekutiv bilong ol evieisen kampani. Air Niugini tim husat i bin stap long dispela bung i bin mekim ol promosen bilong Papua Niugini tu.

Mista Somers i tok dispela promosen i bin wanpela gutpela samting long wanem, em i bin soim ol manmeri bilong ol arapela kantri long wol long Papua Niugini.

BSP i kam bek long Maprik

OL pipel bilong Maprik long Is Sepik Provins bai i no inap taitim bun na wokabout i go long Wewak long mekim benking bilong ol.

Ol manmeri bilong Maprik i save yusim bikpela mani long baim rot, na tu, sampela taim em i no save seif long ol long wokabout i go long Wewak long mekim benking.

Bihain long tupela yia, Bank South Pacific (BSP) i bin opim brens bilong ol gen long Maprik long las wik Fonde.

Long opim dispela BSP brens gen, Prais Minista Peter O'Neill wantaim Gavana bilong Is Sepik Provins, Gren Sif Michael Somare, i bin stap namel wantaim ol pipel bilong Maprik, na ol opisa bilong BSP.

BSP Deputi Jenerel Menesa bilong Retail Benking, Kili Tambua, i tok kam

bek bilong BSP long Maprik i soim ol manmeri olsem BSP i laik bringim sevis i go long hap we ol man i stap long en.

Mista Tambua i tok tenkyu long Memba bilong Maprik John Simon na ol Distrik Edministresen na ol komyuniti lida bilong Maprik long wok bung wantaim BSP, na kamapim BSP gen long Maprik.

"BSP i kam bek long Maprik em i wanpela gutpela eksampel long hat wok na strong bilong ol pipel yet long bringim sevis i go long ol yet," Mista Tambua i tok.

Mista Tambua i singaut long ol komyuniti long lukautim ol dispela sevis, na BSP bai bringim gutpela benking long ol.


Long dispela opening seremoni, planti manmeri bilong Maprik i bin kamap long lukim kam bek bilong BSP.



Air Niugini Fokker 100 i sindaun long ples balus long Pot Mosbi. Poto Air Niugini



Gavana bilong Is Sepik Provins, Gren Sif Sir Michael Somare, i amamas long lukim kam bek bilong BSP long Maprik.



Ol Ramu NiCo Nesenel Woka sainim awods agrimen

OL NESENEL wokman meri bilong Ramu NiCo Menesmen (MCC) Limited i ken amamas nau bihain long wanpela bikipela awods long lukluk long pei, trening na ol arapela samting long wok kondisen bilong ol wantaim kampani em ol i sainim long Madang long Sarere, Mas 15, 2014.

Dispela industrial awod i kisim sampela taim bipo long ol i sainim agrimen long Sarere, tasol em histori na bikipela samting long gutpela bilong ol nesenel wokman bilong Ramu NiCo.

Siaman bilong Ramu NiCo Menesmen, Zhao Shimin long toktok bilong em long taim bilong sainim agrimen i tokaut olsem em i amamas long ol mausman bilong ol nesenel wokman meri long wok strong i kam inap long taim bilong sainim awod.

Dispela saining seremoni i bin kamap long Madang Lods Hotel long Madang, na siaman bilong kibung em Mista Philip Worri, na i lukim tu Industrial Menesa bilong Dipatmen ov Leba na Industrial Rilesens, Herman Gire na ol opisal bilong Mineral Risoses Atoriti (MRA) olsem Ramu Projek kodineta, Carter Oiee wantaim loya i makim ol nesenel wokman, Ben Peri tu i stap.

Ol lain mausman bilong ol nesenel wokman makim KBK Main, husat i stap long sainim awod em Richard Asiba wantaim Noah Garima na lain makim Basamuk Rifaineri wokman long sainim awod agrimen em Robert Peter wantaim Herman Kabul.

Siaman bilong Ramu NiCo, Mista Zhao i tok tenkyu long Dipatmen ov Leba na Industrial Rilesens wantaim MRA long sapot na helpim em i givim long ol nesenel wokman long taim bilong ol toktok i go kam long kamap wantaim dispela agrimen.

Mausman bilong ol nesenel wokman, Richard Asiba i tok amamas long ol wanwok bilong em long KBK na BSK long sanap strong na sapotim ol long bringim ol hevi go fowat na lukim kampani i luksave.

Mista Asiba i tok tenkyu long wanpela wanwok, Thomas Konda, husat i sanap strong long namba wan taim yet long pusim hevi bilong ol wokman long kampani i ken luksave.

Ramu Projek kodineta wantaim MRA, Carter Oiee i tok amamas long ol nesenel wokman long bilip bilong ol na wok-bung wantaim na sapot ol i givim ol yet long bringim ol wok na wanbel pasin long stat bilong toktok i kam olgeta long taim bilong sainim awod stret.

Loya husat i makim ol nesenel wokman, Ben Peri i tok MRA i bin kisim em long helpim ol nesenel wokman long givim ol tingting long helpim na lukim olsem wanem hevi na tingting bilong ol nesenel wokman em i ken stap insait long leba lo bilong PNG.

Mista Zhao i tok olsem Ramu NiCo long nau yet i wok long remp-ap proses na em i bungim planti ol bikipela salens tru long sait long prodaksen na masin na tuls bilong wok. Moa long en tu, kampani nau yet i bungim salens i stap long sait long prais bilong nikel long wol maket, nau i stap daunbilo tru.

Mista Zhao i tok long sanap strong long bungim ol kain salens olsem, olgeta lain i mas wok bung wantaim na traिम daunim ol dispela hevi wantaim.

Mista Zhao i tok sainim bilong kontrak i min olsem aninit long sapot na helpim long Dipatmen bilong Leba na MRA, Ramu NiCo bai karimaut ol wok long strongim ol nesenel wokman meri bilong em long sampela ol eria olsem trening, strongim kondisen bilong wok na tu kamapim wanpela nupela industrial rilesens.

Em i tok olsem dispela saining bilong kontrak agrimen i kamapim gutpela luksave long sait bilong ol wokman na wanem samting ol i ken wokim na duti bilong ol na tu wankain em Kampani i mas wokim long lukautim wok na kondisen bilong ol wokman meri.

"Mi gat strongpela bilip olsem bihain long mipela i sainim dispela kontrak, mipela olgeta i ken wok bung wantaim long kamapim gutpela prodaksen, bringimap level bilong operesen na tu strongim pasin long toktok i go kam namel long wokman na kampani long olgeta lain i ken save long veliu bilong ol yet," Mista Zhao i tok.

Ramu NiCo nesenel wokman wantaim loya bilong ol Ben Peri na Ramu NiCo Bod Siaman, Zhao Shimin



Ol mausman bilong Ramu NiCo nesenel wokman Robert Peter, Herman Kabul na Noah Garima long taim bilong sainim awod long las wik Sarere.



Ramu NiCo Bod Siaman, Zhao Shimin i makim kampani na sainim awod.



Grup poto bihain long ol i sainim awod agrimen.

RAMU NiCo **Redi long givim** insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisanim. Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikipela wok konstraksen long namba tu hap bilong 2008. I kam inap nau, olgeta bikipela konstraksen wok long Krumbukari main sait na Basamuk rifaineri i pinis, na projek i stap redi long kisim komisani o tok orait long mekim wok. Long wol tu, dispela kain hariap sanapim em i no kamap bipo long wanpela kain bikipela projek olsem, na i daunim olgeta

salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 milian kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

Wanpela Ramu NiCo, Wanpela Komuniti

NDB Rot So long Vanimo i kamap gut



WANPELA de Rot So bilong Nesanel Developmen Benk long Vanimo, Sandaun Provins i bin kamap gut stret long ai bilong ol lain i kamap long lukim.

Rijonal Menesa bilong NDB Marianne Uraiwa na NDB Meri long Bisnis Des i kodinetim dispela Rot So. Em i pulim planti man na meri i kam long olgeta hap bilong provins long painimaut moa long wanem kain we ol i ken kisim helpim long NDB.

Dispela Rot So em i bilong kamapim tok save bilong tupela kain dinau aninit long Meri long Bisnis Des, Stat Ap na Groa Dinau Mekpas. Rilesens Menesa bilong NDB Meri long Bisnis, Janet Kaule i tok klia long tupela kain dinau, Stat Ap na Groa Dinau Mekpas. Em i tok, NDB em i ejensi bilong gavman na em i stap long mekim wok bilong ol pipel bihainim tingting bilong Visen 2050. NDB i gat

strongpela tingting long strongim na helpim wok bilong kamapim moa wok bisnis long kisim moa mani na tu long givim sans long olgeta man na meri i kisim helpim long kamapim strong ikonomi bilong kantri.

“NDB em i rot bilong gavman i strongim ol SME Sekta na em i gat tingting long 2050 Visen i save toktok long kamapim moa mani na long givim wankain sans long olgeta i ken mekim wok bisnis long mekim sindaun bilong ol kamap gutpela,” Misis Kaule i tok.

Mis Uraiwa i toktok liklik long ol narapela kain dinau i stap insait long Benk long ol pipel i ken kisim, tasol em i tok klia tu long wok bilong bekim dinau em i namba wan samting ol pipel bai i mas klia long en.

“NDB em i benk bilong ol pipel na em i save givim dinau mani wantaim liklik in-tres tasol long mak bilong 6.5 pesen. Tasol taim yu

kisim dinau, em yu mas bekim bai ol narapela tu i ken kisim sans olsem yu long kisim dinau mani tu.” Mis Uraiwa i tok.

Meri i makim ol meri long Sandaun Judith Saroia i tok, em yet wantaim ol narapela meri i gat bikpela laik long mekim bisnis tasol ol i no gat mani.

“Mipela sampela i traim long ranim bisnis long strong bilong mipela yet, na sampela liklik lain i mekim gut tasol planti bilong mipela i painim hat long mekim wok bisnis bikos mipela i no gat inap mani,” Misis Saroia i tok.

“Mipela i save ritim tasol stori bilong NDB i helpim ol meri long narapela hap bilong kantri i mekim gutpela bisnis. Olsem na nau taim yu i kam stap wantaim mipela, em i givim mipela bikpela strong na i givim mipela nupela bel kirap olsem helpim bilong NDB bai kam klostu long ol pipel bilong Vanimo,” em i tok.

Ol fama long kantri bai kisim moa sapot ... Opim nupela agro fam

GAVMAN bai givim moa sapot long ol kumu na prut ol fama long kantri yet i groim na PNG bai stop long baim ol dispela samting long ovasis.

Praim Minista Peter O'Neill i tok olsem taim em i bin opim nupela Agro Industri (AI) Limitit long 9 Mail agro fam ausait tasol log Mosbi siti ol i wokim wantaim helpim bilong gavman bilong Israel.

Dispela em i wanpela nupela fam we ol i yusim ol nupela masin na marasin

samting long groim na lukautim ol kumu.

“Gavman i lukluk long givim sans long ol PNG fama bikos nau, kantri i save baim ol kumu na prut long ausait. Na em bai sapotim ol asples fama long groim ol kumu samting we i pres, gutpela na ol i salim long mani mak we pipel i ken baim ol long en. Mipela i bilip olsem dispela em gutpela rot long kisim yumi i go fowet,” Mista O'Neill i tok.

Mista O'Neill i tok maski yumi gat gutpela klaimet na

graun, yumi no yusim dispela sans long kamapim gutpela samting.

“Olsem na gavman i bin askim Israel long helpim na sanapim wanpela gutpela fam i gat ol nupela na gutpela agro teknologi masin bai helpim long ol wok na kamapim ol gutpela kaikai.

“Gavman i luksave tu long wok we IA1 kampani i mekim long givim trening na strongim ol fama long projek trening senta long fam,” Mista O'Neill i tok.

Em i sapoitim tu trening na

wok ol yut i kisim long Jesus Senta long Halfway Hous long Morata, NCD, na tu ol lain i stap long ol komyuniti klostu.

“Gavman i luksave olsem planti bilong ol 160 PNG na Israel fama i bilong 9 Mail setelmen. Na ol liklik lain saveman long agrikalsa bilong Israel i wokim dispela fam i kam gut stret, Mista O'Neill i tok.

Mista O'Neill i bin opim wanpela nupelaluksave mak na katim riben long opim nupela trening senta.

Ol bisnis long hailans i wari long rot

i kam long ABC

I gat wari olsem sapos i gat bikpela ren long hailans rijon, ol rot i save bagarap

Planti pipoe na ol bisnis i lusim bikpela mani tru long wanem, stap bilong ol rot long haiwe i bagarap tru.

Dispela toktok i kam long wanpela senia leksera bilong Yunivesiti bilong Goroka, John Wanis.

Em i tok o rot i save helpim ol bikpela bisnis bilong kantri, na gavman i mas luksave na hariap long givim helpim i go long ol pipel.

Mista Wanis i tok long taim bilong en, bikpela wari i save kamap long ol papa bilong ol liklik kar long wanem ol kain bagarap i save kamap long ol, na mani bilong baim ol spe pat i save bikpela tru.

Long lukluk blong Mista

Wanis, em i tok i gat tupela bikpela samting em i lukim i save kamapim ol dispela heve.

Wanpela em ol baret bilong ol wara i ron long en i no save gutpela. Taim i gat bikpela ren, wara i save pulap na bikpela long en i save kapsait gen i go ol bikpela rot bilong ol kar i ron long en, na tu, karim ol karanas long rot.

Narapela wari em ol bikpela trak i karim ol bikpela masin i go antap long LNG Projek long Sauten Hailans we hevi bilong ol i bikpela moa. Na sapos i gat liklik hol long rot i stap, na taim dispela bikpela na hevi trak i go antap long ol, dispela i mekim liklik hol i go bikpela moa yet na bagarapim rot ol-

String Ben strong yet long Kainantu

Sape Metta i raitim

STRING ben musik long planti hap bilong PNG em i wok long i go daun, long wanem, westen musik, kalsa na tredisen o pasin tumbuna bilong ol wantaim o ol ausait lain i kamap strong tru na tek ova. Na em i daunim stret ol pasin tumbuna bilong mipela.

Long dispela as, Biku string ben (long poto) bilong Kainantu, Isten Hailans i gat bikpela tingting long holim strong yet string ben musik we em i hap bilong pasin tumbuna bilong ol.

Bikus string ben i bin kamap long selebret wantaim ol ges na ol arapela man-meri long Kainantu long

wanpela bikpela samting i bin kamap long taun i no long taim i go pinis.



Bisnis bilong sanda i ken pulim mani

PEFUM o sanda i kamap olsem wanpela liklik bisnis bilong ol liklik manmeri na pikinini tu long kantri.

Wanpela long ol em Eaglewood sanda. Smel bilong em i naispela moa. Ol i save mekim wantaim skin bilong Eaglewood diwai. Dispela diwai i kamap planti stret long Is na Wes Sepik. Na planti lain long hap i wokim dispela sanda na salim long planti hap bilong kantrilong prais namel long K20 na K50. Poto i soim wokmeri bilong Word Publishing kampani, Sandra Amuru, i soim piksa bilong ol eaglewood sanda we wanpela mangi i kam salim long opis. *Poto: Frieda Sila Kana.*



Piksa bilong ol Eaglewood botol sanda. *Poto: Frieda Sila Kana*

Famili kriket long Hanuabada

HETOA Kriket Asosiesen em i wanpela spot grup insait long ples Hanuabada long Nesenel Kepitel Distrik (NCD).

Kriket Resis bilong Hetoa Asosiesen i bin stat long mun Februeri na em bai i go inap long 3-pela mun. Planti lain i stap insait long dispela kriket asosiesen, samting olsem 40 pesen em ol wok lain tasol ol i save stap long ples na go wok insait long NCD.

Astingting bilong dispela kriket resis em long strongim pasin bilong stap wanbel na bung wantaim bilong ol wan famili na ol klen memba husat i save stap long ples Hanuabada yet, na ol lain i save stap ausait long narapela hap bilong siti o wanpela narapela Motu-Koitabu ples long NCD.

Wanpela famili bilong Taunao bilong Hetoa Klen em ol lain pikinini bilong let imi Taunao. Ol dispela pikinini em, 4-pela man, Lahui, Geita, Gogobe na Leke na sista bilong ol Paruru husat i save stap long Gav-eraha long Taurama Rot. Mama bilong ol em bilong Kira Kira ples na taim ol i liklik yet papa bilong ol i pasim tok olsem ol bai i stap long ples bilong mama. Taim papa bilong ol i bin dai moa long 10-pela yia i go pinis, ol pikinini i no save go moa long Hanuabada.

Olsem na nau dispela gem bilong kriket i pulim dispela famili bilong Simi i save go bek long ples bilong papa long Hanuabada long olgeta Sarere na bung wantaim ol famili na wan blut bilong ol.

Presiden bilong Asosiesen, Peter Taunao wantaim Vais bilong em, Chapan Moang, Tresera Sam Baru na Seketeri Oala Reva i amamas tru long dispela spot resis long ples. Em i no gat fi bilong em.

Mista Taunao i tok, olsem strongpela tingting bilong dispela kriket resis namel long haus lain na famili bilong ol long tripela bris long solwara em long redi long go insait long resis bilong kriket bilong ples. Em i tok sapos husat tim i win, bai ol i go insait long taun resis na redi long PNG Gems long Novemba, na tu long i go insait long 2015 Pasifik Gems.

I gat 16 klap insait long Hetoa Kriket Asosiesen, 8-pela bilong ol meri na 8-pela bilong ol man. Ol i putim nem bilong ol kantri husat i save pilai kriket. Nem bilong ol klap em; Australia, Nu Silan, Ingran, Saut Afrika, India, Pakistan, Wes Indis na PNG. Na i no pilai nating, ol dispela tim i gat ol unifom bilong ol i makim stret kala bilong

ol dispela kantri ol i kolim nem long en.

Tasol wanpela sore samting em ol i no gat pilai graun olsem na ol i save droim pits bilong ol long bikrot bilong ol kar i save i go i kam. Man ol i smat moa. Taim wanpela kar i kam, ol i save stopim pilai na larim kar i go pastaim na bihain ol i go bek na pilai gen.

1. Rao Sam i bet bilong Ingran klap. Em i wanpela PNG intenesenel anda 19 pilaia.
2. Udu Vai em i gat 11-pela kriket tasol. Em i pilai long Pakistan Kriket Klap.
3. Tania em i wanpela intenesel pilaia tasol nau em i pilai long Nu Silan Kriket Klap.
4. Joe Dafi bilong Australia klap.
5. Peter Taunao - Presiden bilong Hetoa Kriket Asosiesen.
6. Ol PNG klap i amamas long win bilong ol. Poto na stori - David Ban na Frieda Sila Kana



- Ol Wiken Spot Dno -



SEASON PROPER - SEMI FINALS Saturday 22nd March 2014

DIAMOND TWO

TIME	TEAMS	TEAMS	GRADE	REMARKS
9.00 - 9.30	Juniors			Teeball
9.30 - 10.00	U/16			

DIAMOND THREE

TIME	TEAMS	TEAMS	GRADE	REMARKS
10.00 - 11.30	Stingers	Admiralty	B	Do or Die
11.30 - 13.00	Stingers	United Sisters	A	Do or Die

INTRUST SUPER CUP DRAW

Round 4 (22-23 March)

Home	Vs	Away
PNG		Pride
Capras		Bye
Sunshine Coast		Norths
Redcliffe		Easts
Mackay		Wynnum
Souths		Tweed
Burleigh		Ipswich

NATIONAL SOCCER LEAGUE DRAW

Round	Date	Time	Team A	Vs	Team B	Venue
	22nd - Mar	12.30pm	Eastern Stars FC	Vs	Lae FC	To be Advised
7		3.00pm	Hekari FC	Vs	Gigira Laitepo Morobe FC	To be Advised
		3.00pm	Besta FC	Vs	Admiralty FC	SIK/Lae
Bye			Oro FC			

Tkatchenko tok PRL i gat dinau

Isaac Liri i raitim

LONG wanpela nius i bin kamap long wanpela nius-pepa las wik, ol opisa bilong Pot Mosbi Ragbi Lig i tok Spots Ministri i no helpim Pot Mosbi Ragbi Lig (PRL) long painim ples bilong pilai.

Tasol Minista bilong Spots Justin Tkatchenko i tok las wik olsem dispela nius i rong.

Mista Tkatchenko i tokaut olsem PRL i no ken sutim tok nabaut long wanem, em i bin tokim ol long las yia yet olsem em i gat bikpela laik long helpim ol tasol ol i no kam long em na askim long helpim.

Minista Tkatchenko i tok

em i bin painimaut olsem PRL i gat dinau wantaim Murray Bareks, na long dispela as, Murray Bareks i les long PRL i yusim ol fasiliti bilong en.

Minista i tok olsem pasin bilong sutim tok i no gutpela long wanem, bai i no inap kamapim wanpela gutpela samting, na ol spot manmeri bai kism taim.

Taim Spot Ministri i bin tokaut olsem Lloyd Robinson Oval bai i gat konstraksen wok i kamap long en, em i bin tok save long ol opisa bilong PRL, na ol i klia long dispela.

Minista i tok tu olsem em i ken helpim PRL long bekim dinau bilong ol sapos ol i askim em.



Minista bilong Spot Justin Tkatchenko i tokaut olsem Pot Mosbi Ragbi Lig (PRL) i gat dinau i stap yet.

Ol spot fasiliti bilong Pasifik Gems bai redi long Mas 2015

Isaac Liri i raitim

MINISTA bilong Spots Justin Tkatchenko i tok las wik olsem olgeta spot fasiliti bilong Pasifik Gems bai redi long mun Mas long neks yia.

Na taim ol spot manmeri bilong ol arapela Pasifik Ailan kantri i kam long mun Julai long neks yia, ol bai i lukim olsem olgeta fasiliti i redi, na ol bai i amamas.

Nau long dispela taim Minista Tkatchenko i wok long go long wan wan ol fasiliti na lukim olsem olgeta wok i ran gut tasol

Em i tok ol konstraksen kampani i wok 24 aua na 13 de long wanpela wik, na ol i no kism gutpela malolo tumas long wanem, ol laik pinisim olgeta wok bipo long pilai i stat.

Em i tok nau yet wok i stap olsem 40 pesen long pinis bi-

long en, na long pinis bilong dispela yia, wok bai i stap 90 pesen long pinis bilong en, na long mun Mas long neks yia, olgeta wok bai pinis na ol fasiliti bai redi.

Antap long dispela Mista Tkatchenko i singaut long olgeta ogenesesen husat i sapatim Pasifik Gems long wok bung wantaim Ministri bilong em, na tu, wantaim Pasifik Gems Ogenaising Komiti (GOC) long kamapim gut ol dispela pilai

Em i laikim (UPNG) long stap amamas na redi long lukautim ol etlit bilong ol arapela Pasifik Ailan kantri husat bai i kam stap long Gems Viles.

Em i tok Yunivesiti i mas amamas, long wanem, K300 milien i go long kamapim dispela Gems Viles, na bihain long dispela Yunivesiti bai kism gutpela bilong en, na yusim dispela Gems Viles

olsem haus slip bilong ol sumatin.

Mista Tkatchenko i bin raitim wanpela leta i go long Sansela bilong UPNG, na tu dispela wankain leta bai i go long ol arapela ogenesesen we bai i wok bung wantaim GOC long kamapim Pasifik Gems.

Dispela leta bilong Minista Tkatchenko i toktok moa long ol gutpela fasiliti bilong ol spot manmeri long yusim.

Em i tok sapos i gat ol gutpela fasiliti, ol spot manmeri bai i amamas na pilai gut na Tim Papua Niugini bai i gat sans long winim planti gol medal.

Minista Tkatchenko i laikim olsem olgeta i mas wok bung wantaim na no gat manmeri o ogenesesen i wok em yet.

Em i tok gutpela wok bung bai kamapim gutpela ol fasiliti bilong yusim long Pasifik Gems na long bihain taim tu.

Tim PNG gat mausman nau

Isaac Liri i raitim

TIM PNG bilong 2015 Pasifik Gems i gat mausman nau, dispela mausman em ol i save kolim long Chef De Mission.

Olgeta tim husat i save pilai long ol bikpela gems olsem i save gat Chef De Mission long sapatim ol etlit, na tu, sapatim menesmen bilong ol etlit.

Wok bilong Chef De Mission em i wanpela bikpela wok tru, long wanem, em bai i mas stap olsem lida na lukim olsem ol etlit na ol menesmen i orait na inap long kism ol gutpela risal.

PNGOC i makim Richard Kassman long mekim dispela wok.

Richard Kassman em i bin stap olsem Chef De Mission bilong Tim PNG long Mini Pasifik Gems las yia long Wallis na Futuna, na aninit long lidasip bilong em, Tim PNG i bin kamap namba wan.

Bod bilong PNGOC i bin go pas long makim Mista Kassman.

Presiden bilong PNGOC, Sir John Dawanincura i tok ol i bin makim Mista Kassman long wanem em i gat bikpela ekspiriens bilong stap olsem lida bilong ol spot manmeri na spot menesa na kosa. Na long dispela as, PNGOC i gat



(L-R) Presiden bilong Papua Niugini Olimpik Komiti (PNGOC) i sekan wantaim Chef De Mission bilong Tim PNG Richard Kassman. Jenerel Seketeri bilong PNGOC, Auvita Rapilla i sanap arere. *Poto Nicky Bernard*

strongpela bilip olsem Mista Kassman bai mekim gut wok.

Mista Kassman i bin stap bipo olsem wanpela kosa, pilai na tu em i bin mekim ol arapela wok edministresen long ol kain spot olsem sofbal, soka, ragbi yunion na tu long Va'a.

Mista Kassman i amamas long stap olsem Chef De Mission bilong Tim PNG long Pasifik Gems na em i tok olsem em bai strongim Tim PNG long kism ol gutpela risal.

Mista Kassman i luksave

olsem em i no long liklik wok long stap olsem lida, tasol em i gat laik long kism dispela salens, na sevim kantri na mekim Papua Niugini i amamas.

I bin gat ol arapela manmeri husat i bin resis wantaim Mista Kassman long kism dispela posisen olsem Chef De Mission, tasol bihain long skelim bilong PNGOC bod, ol i lukim olsem Mista Kassman i fit long kism dispela posisen.

Mista Kassman i tok olsem Papua Niugini i gat bikpela

sans long winim dispela Pasifik Gems sapos olgeta manmeri na ogenesesen insait long kantri i givim sapat bilong ol.

Tim PNG i gat mausman ol lida long lukautim ol pinis tasol ol arapela samting olsem menesmen tim i no kamap yet na Jenerel Sekreteri bilong PNGOC, Auvita Rapilla i tok olsem ol menesmen tim bai redi long neks mun, na long pinis long mun Jun olgeta menesmen tim bilong wan wan spot bai redi.

Pasifik Gems bai stat long namba 4 de bilong mun Julai i go inap namba 18 long neks yia.

Ol spot we bai i kamap long dispela Pasifik Gems em Etlitiks, Basketbal, Bis Volibal, Bodibilding, Boksen, Kriket, Soka, Golf, Hoki, Karate, Lon Bools, Netbal, Pawa lifting, Ragbi Sevens, Ragbi Nains, Seiling, Suting, Sofbal, Skwas, Swimming, Tebol Tennis, Taekwondo, Tennis, Ragbi Tas, Triatlon, Va'a, Indo-Volibal na Weitlifting.

EU Kap bai kamap gen

Isaac Liri i raitim

EUROPEAN Kap (EU Kap) em i wanpela soka kompetisen i save kamap long Madang Provins namel long ol Teseri na sekenderi skul long taun eria.

Dispela kompetisen i save lukim Divine Word University (DWU), Madang Teknikel Skul, Madang Tisa Koles, Mari Taim Koles, Lutren Skul ov Nesing na Tusbab Sekenderi i pilai namel long ol yet long winim kap na prais mani.

EU Kap i save lukim planti ol gutpela soka pilai na ol selekta bilong Nesanel Soka Lig (NSL) i save putim was long dispela kompetisen long painim ol pilai husat i gat save na skil long pilai soka.

DWU i save gat tripela tim i pilai long dispela kompetisen. Ol tim bilong DWU em Fekalti ov Arts, Fekalti ov Bisnis na Infometiks, na Fekalti ov Helt Saiens. Long las yia Fekalti ov Arts i bin winim dispela kompetisen.

European Union i save givim mani long kamapim dispela kompetisen we i save stat long mun Mas na pinis long mun Me.

Ol tim bilong EU Kap i save yusim oval bilong DWU na Madang Teknikel Koles long pilai.

Tim Sentral makim meri Jeneral Tim Menesa

Kolopu Waima i raitim

TIM Sentral Komiti i makim Marina Faiteli olsem Jeneral Tim Menesa, na meri husat bai go pas long 6th PNG Gems long Lae, Morobe provins.

Ol i makim em long namba

tu miting bilong ol long Kone-dobu long dispela mun.

Misis Faiteli, husat i Ekting Deputi Provinsal Edministreta, i tok orait long mekim dispela wok, na i tok tenk yu long ol komiti memba long bilip long ol meri long go pas long dispela gem.

Em i askim olgeta lain long

sapat bilong ol.

"Mi tok tenk yu long bilip na tras long lidasip bilong ol meri na yupela makim mi long go pas long dispela bikpela gem bai kamap long Lae. Na mi i nidim sapat bilong yupela long soim gutpela pilai stap long ol bus ples bilong mipela long Sen-

tral," Misis Faiteli i tok.

Em i tok long makim maus bilong ol meri Sentral, emi tok tenk yu long komiti long luksave long ol meri olsem impoten patna long developim spot long Sentral Provins.

"Yumi mas olgeta kamap papa long tim na mekim wok

redi long gem bai kamap long Novemba na makim ol gutpela lain bai makim Sentral provins long go pilai long kism moa gol," Misis Faiteli i tok.

Midia Opisa bilong Sentral Provinsal Gavman, John Iamo bai go pas long lukautim lojistik komiti na Vagi

Daure bai lukautim Fundraising komiti bilong distrik na edministresen.



Deputi Gavana bilong Sentral na Siaman bilong Komyuniti Desmond Bairai tok provinsal gavman bai givim ful sapat na i givim K10, 000 long statim wok bilong painim mani bilong ol.





SPOTS DRO RAUN 3

Fraide: Mas 21, 2014

Suncorp Stadium
Broncos V^s Roosters

ANZ Stadium
W/Tigers V^s Rabbitohs

Sarare: Mas 22, 2014

Sportingbet Stadium
Panthers V^s Bulldogs




Remondis Stadium
Sharks V^s Dragons




Smiles Stadium
Cowboys V^s Warriors




Sande: Mas 23, 2014

Brookvale Oval
Eagles V^s Eels






GIO Stadium
Raiders V^s Titans




Mande: Mas 24, 2014

AAMI PARK
Storm V^s Knights

Raun 2 Poin Lata

Pos	Tim	W	B	L	D	Pts
1.	Dragons	2		0		4
2.	Broncos	2		0		4
3.	Storm	2		0		4
4.	Roosters	1		1		2
5.	Panthers	1		1		2
6.	Rabbitohs	1		1		2
7.	W/Tigers	1		1		2
8.	Cowboys	1		1		2
9.	Sea Eagles	1		1		2
10.	Raiders	1		1		2
11.	Titans	1		1		2
12.	Eels	1		1		2
13.	Bulldogs	1		1		2
14.	Sharks	0		1		0
15.	Knights	0		2		0
16.	Warriors	0		2		0

3. PARAMATTA: PROP bilong Paramatta Darcy Lussick i no inap pilai long foapela NRL gem bihain long em i mekim wanpela hai takel long Jared Waerea-Hargreaves bilong Sydney Roosters.

4. ST GEORGE: ST George Illawarra i kam bek strong na winim ol Warriors 31-12 long Auckland. St George i skoim tupela trai long stating bilong namba tu hap, na long hap ol Warriors i no bin inap long bungim ol Dragons.



CANTERBURY: OL Canterbury Bulldogs i kamapim namba wan win bilong ol long NRL wantaim stail taim ol i winim ol Cronulla Sharks 42-4 long Sydney Olimpik Stadium long Mande nait. Planti pilaia bilong ol Sharks i bin kisim bagarap na i no pilai long dispela gem. Ol dispela pilaia em Paul Gallen, Beau Ryan, Todd Camey na Jeff Robson. Ol nupela pilaia bilong Sharks husat i pilai namba wan gem bilong ol i no bin inap long ol Bulldogs husat i bin gat strongpela tim stret.



CANBERRA: FULBEK bilong Canberra Raiders Anthony Milford i bin helpim long kamap bilong tripela trai bilong ol we i bin lukim ol i winim ol Newcastle Knights 26-20 long Hunter Stedim long Sande. Dispela em namba wan win bilong ol Raiders long dispela yia.



Ol spot eksen poto long wiken..

Ol Poto Nicky Bernard.

MIPELA YA: Kimbe Rebels i stap King bilong Ragbi Yunien Sevens. Ol win bihain long Morobe na Mosbi i no kisim pilai graun bihain long pait.



CT King pilai i ranim bal long lek bilong em taim pilai bilong Defense i ran long raunsim long PMSA soka resis long Bisini.



Yokomo sot stop i singaut long bal taim pilaia bilong Eagles i ran go long namba 2 bes long sofbal resis long Bisini. Tupela tim bai bung gen long dispela wiken long semi fainal.



Besta United pilaia bilong Lae i traim long abrusim pilaia bilong Hekari long wiken NSL resis long Pot Mosbi. Hekari i winim dispela pilai 4-1.



Beta bilong Bears i traim long hamaim wanpela bal long semi fainal bilong ol meri sofbal long Bisini. Bears i lus long ol Sisters.



Kepten bilong ol Besta United bilong Lae i soim gutpela pilai long wiken long Mosbi.



Ol PNG Hunter bai kamap namba wan o nogat?

Isaac Liri i raitim

BIHAIN long tripela gem bilong ol PNG Hunter long Inrast Supa Kap kompetisen, ol i sindaun namba tu long lata bihain long ol maina premia bilong las yia, Northern Pride.

Bikpela win bilong ol Hunter long las wik long Kokopo i bin lukim bikpela skoa 46-14. Dispela i bin mekim kosa bilong ol Central Queensland Capras Jason Hetherington i tok olsem Kalabond Oval long Kokopo em i wanpela matmat stret.

Ol Hunter wantaim ol Northern Pride i gat sikis poin na tupela tim i no lus yet long ol gem bilong ol.

Ol arapela tim husat i gat

sikis poin em Souths Logan Magpies na Norths Devils.

Northern Pride i stap namba wan long lata bikos long planti gem bilong ol, ol tim husat i pilai wantaim ol i no skoim planti skoa egensim ol.

Northern Pride i gat 38 poin skoa egensim ol na ol Hunter i gat 48 poin skoa egensim ol.

Ol stetistiks bilong kompetisen i soim olsem Northern Pride i gat strongpela difens rekot, na dispela em wanpela eria we kosa bilong ol Hunter Michael Marum bai lukluk long em taim ol i pilai long Kokopo long dispela wiken.

Siaman bilong Papua Niugini Ragbi Futbol Lig (PNGRFL), Sandis Tsaka i tok dispela gem namel long ol

Hunter na Northern Pride em bai wanpela bikpela gem.

Em i tok ol Northern Pride em wanpela tim we planti manmeri i wok long tok ol i namba wan tim insait long kompetisen long dispela yia.

Na sapos ol Hunter i kisim gutpela sapat long ol lokal sapat long dispela wiken, ol Hunter i ken winim Northern Pride, na stap namba wan long lata bilong kompetisen.

Ol Hunter i trening strong long dispela wik, na ol i redi long pilai wantaim ol Northern Pride na stap namba wan long kompetisen lata.

Insait long lain ap bilong ol Hunter, Noel Zemming bai i kisim ples bilong Roger Laka, na bai pilai long hapbek, na prop Michael Mexico bai pilai namba wan gem bi-



HEKARI NAMBA WAN YET: Long pinis bilong raun sikis bilong Nesenel Soka Lig (NSL), Hekari Yunaitet i holim strong yet namba wan spot long lata. Hekari i winim foapela gem bilong ol na ol i gat tupela dro. Long las wik ol i bin winim Besta Yunaitet 4-1. Long dispela wiken ol bai pilai egensim Gigira Laitepo Morobe FC. Long dispela poto bai yu lukim pilaia bilong Hekari i pasim bal i go long poroman bilong em taim pilaia bilong Besta i atek. *Poto Nicky Bernard*

long em wantaim ol Hunter.

Lain ap bilong ol Hunter em i sanap olsem, 1. Adex Wera 2. Gary Lo 3. Thompson Teteh 4. Albert Patak 5.

George Benson 6. Israel Eliab 7. Noel Zemming 8.

Joe Bruno 9. Wartovo Puaru 10. Gonzela Urakusie 11. David Loko 12. Brandy Peter

13. Sebastian Pandia 14.

Tiger Emery 15. Willie Minoga 16. Lawrence Tu'u 17. Michael Mexico 18. Edward Goma.



PMV

DIESEL OIL



BOROKO MOTORS

PORT Moresby	☎ 325 5255
LAE	☎ 472 1144
MT HAGEN	☎ 542 1033
TARUBIL	☎ 649 9046
KIMBE	☎ 933 5035
MAKING	☎ 422 2558
KOKOPO	☎ 932 8192
GOROKA	☎ 932 3352

Email: info@borokomotors.com.pg
 Website: www.borokomotors.com

PMV OIL BILONG YUMI